

SANCTISSIMI DOMINI NOSTRI DOMINI

P I I

DIVINA PROVIDENTIA

P A P A E S E X T I

Damnatio quamplurium Propositionum Excerptarum ex Libro Italico Idiomate impresso sub titulo = *Atti, e Decreti del Concilio Diocesano di Pistoja dell' An. MDCCLXXXVI.* In Pistoja per Atto Bracali Stampatore Vescovile. Con approvazione.

Cum prohibitione ejusdem Libri, et aliorum quorumcumque in ejus defensionem tam forsitan editorum, quam in posterum edendorum.



ROMÆ MDCCXCIV.

Ex Typographia Rev. Camerae Apostolicae





(III)

PIUS EPISCOPUS

SERVUS SERVORUM DEI

*Universis Christifidelibus salutem ,
et Apostolicam Benedictionem .*

AUCTOREM fidei , et Consummatorem JESUM aspicientes nos jubet Apostolus (a) sedulo recogitare qualem , quantamque ille sustinuit a peccatoribus adversum semetipsum contradictionem , ut ne laboribus , et periculis defatigati deficiamus aliquando animis nostris , peneque concidamus . Hac saluberima cogitatione muniri nos ac refici tum maxime necessum est , cum adversus Corpus ipsummet Christi , *quod est Ecclesia* (b) , diræ istius , nec unquam desituræ conjurationis æstus acrius exardescit : Ut a Domino confortati , et in potentia virtutis ejus , scuto fidei protecti resistere possimus in die malo , et omnia tela iniquissimi ignea extinguere (c) . In hoc sane motu temporum , in hac rerum perturbatissima conversione gravis est quidem bonis omnibus contra omnes cujusque generis Christiani No-

(a) Ad Hebr. 12.

(b) Ad Coloss. 1.

(c) Ad Ephes. 6.

(IV)

minis hostes colluctatio subeunda : Gravior Nobis , quibus pro credita pastorali nostræ sollicitudini Gregis totius cura , et moderatione , *major cunctis , Christianæ Religionis zelus incumbit* (a) . Verum in hac ipsa oneris gravitate , quæ humeris nostris imposita est , *portandi onera omnium , qui gravantur* , quo magis conscii Nobis sumus infirmitatis nostræ , eo firmiorem in spem erigit Nos , et sublevat Apostolici hujusce munus in persona B. Petri Divinitus instituta ratio , ut qui semel tradita sibi a Christo Ecclesiæ gubernacula nunquam derelicturus erat , ipse Apostolicæ gubernationis onera in illis portare non desineret , quos ei Deus protegendos perpetua successione , ac tuendos heredes dedisset .

Et in hisce quidem ærumnis quæ undique circumstant , ad ceterarum molestiarum velut cumulum accessit , ut unde oportuerat Nos gaudere , majorem inde tristitiam hauriremus . *Quippe cum aliquis Sacrosanctæ Ecclesiæ Dei præpositus sub Sacerdotis nomine ipsum Christi populum a tramite veritatis in præceptis devixæ persuasionis avertit , et hoc in amplissima Urbe , tum plane est geminanda lamentatio , et major sollicitudo adhibenda* (b) .

Fuit sane non in ultimis terris , verum

(a) S. Siricius ad Himerium Tarrac. Ep. 1. ap. Coust.

(b) S. Celest. I. Ep. 12, apud Coust.

(V)

in media luce Italiæ, sub oculis Urbis, et prope Apostolorum limina; Fuit Episcopus duplicis Sedis honore insignis, (Scipio de Ricciis antea Episcopus Pistorien., et Præten.) quem ad Nos pro pastoralis munere suscipiendo accedentem paterna caritate complexi sumus: qui vicissim Nobis, atque huic Apostolicæ Sedi in ipso Sacræ Suse Ordinationis ritu debitam fidem, et obedientiam sollemnis jurisjurandi religione obstrinxit.

Atque is ipse non longo intervallo posteaquam a complexu nostro cum osculo pacis dimissus ad commissas sibi plebes accessit, coacervatorum perversæ sapientiæ Magistrorum fraudibus circumventus eo cœpit intendere, ut quam superiores Antistites ex Ecclesiastica regula laudabilem, et pacatam Christianæ institutionis formam jam pridem invexerant, ac pene defixerant, non ille pro eo ac debebat, tueretur, cohereret, perficeret, sed contra per speciem fictæ reformationis importunis inducendis novitatibus perturbaret, convelleret, funditus everteret.

Quin etiam cum et hortatu nostro ad Synodum Diocesanam animum adjunxisset, præfracta ejus in suo sensu pertinacia effectum est, ut unde remedium aliquod vulnere petendum erat, inde gravior perniciēs enascetur. Sane postquam Synodus hæc Pistoriensis e latebris erupit, in qui-

(V I)

bus aliquandiu abdita delituit ; nemo fuit de summa religione pie , sapienterque sentiens , qui non continuo adverterit , hoc fuisse Auctorum consilium , ut quæ antea per multiplices libellos pravarum doctrinarum semina sparserant , ea in unum velut corpus compingerent , proscriptos dudum errores exsuscitarent , Apostolicis , quibus proscripti sunt , Decretis fidem , auctoritatemque derogarent .

Quæ cum cerneremus , quo graviora sunt per se , tanto impensius Pastoralis nostræ sollicitudinis opem efflagitare , mentem convertere non distulimus ad ea capienda consilia , quæ surgenti malo vel sanando , vel comprimendo accommodatiora viderentur .

Atque in primis sapientis moniti memores Prædecessoris nostri B. Zosimi (a) , ea quæ magna sunt , magnum pondus examinis desiderare , Synodum ab Episcopo editam primum quatuor Episcopis , aliisque adjunctis e Clero Sæculari Theologis examinandam commisimus : Tum et plurium S. R. E. Cardinalium , aliorumque Episcoporum Congregationem deputavimus , qui totam Actorum Seriem diligenter perpenderent , loca inter se dissita conferrent , excerptas Sententias discuterent , quorum Suffragia coram Nobis voce , et scripto edita excepimus : qui et Synodum universe reprobendam , et

(a) S. Zosimus *Epist.* 2. *ap. Const.*

(VII)

plurimas inde collectas propositiones ; alias quidem per sese ; alias attenta Sententiarum connexionem plus minusve acribus censuris perstringendas censuerunt : Quorum auditis perpensisque animadversionibus , illud quoque Nobis curæ fuit ; ut selecta ex tota Synodo præcipua quædam pravarum doctrinarum capita , ad quæ potissimum fusæ per Synodum reprobandæ Sententiæ directe vel indirecte referuntur , in certum deinceps ordinem redigerentur ; eisdemque sua cuique peculiaris censura subiceretur :

Ne vero ex hac ipsa tametsi accuratissime peracta sive locorum collatione , sive Sententiarum disquisitione ; pericacis homines obtrectandi occasionem arriperent , ut huic forte jam paratæ calumniæ obviam iretur , sapienti consilio uti statuimus , quod in emergentibus huiusmodi periculosis , noxiisve novitatibus reprimendis plures Nostri SSmī Prædecessores , tum et gravissimi Antistites ; ac Generales etiam Synodi rite ; cauteque adhibitum , illustribus exemplis testatum , commendatumque reliquisent :

Norant illi versutam Novatorum fallendi artem , qui Catholicarum aurium offensionem veriti , captionum suarum laqueos persæpe student subdolis verborum involucris obtegere , ut inter discrimina sensuum (a) latens error

(a) S. Leo M. Ep. 129. Edit. Baller.

(VIII.)

lenius influat in animos, fiatque ut corrupta per brevissimam adjectionem, aut commutationem veritate sententiæ, Confessio quæ salutem operabatur, subtili quodam transitu vergat in mortem. Atque hæc quidem involuta, fallax disserendi ratio, cum in omni orationis genere vitiosa est, tum in Synodo minime ferenda, cujus est hæc laus præcipua, eam in docendo dilucidam consecrari dicendi rationem, quæ nullum offensionis periculum relinquat. Quo in genere proinde si quid peccatum sit, hac nequeat, quæ afferri solet, subdola excusatione defendi, quod quæ alicubi durius dicta exciderint, ea locis aliis planius explicata, aut etiam correctæ reperiantur; quasi procax isthæc affirmandi, et negandi, ac secum pro libito pugnandi licentia, quæ fraudulenta semper fuit Novatorum astutia ad circumventionem erroris, non potius ad prodeudum, quam ad excusandum errorem valeret: Aut quasi rudibus præsertim, qui in hanc vel illam forte inciderint partem Synodi vulgari lingua omnibus expositæ, præsto semper essent alia, quæ inspicienda forent, dispersa loca, aut his etiam inspectis satis cuique facultatis suppeteret ad ea sic per sese componenda, ut, quemadmodum perperam isti effutiunt, erroris omne periculum effugere valerent. Exitiosissimum profecto insinuandi erroris artificium, quod in Constantinopolitani Antistitis Ne-

(IX)

istorii litteris jam olim sapienter detectum gravissima reprehensione Prædecessor Noster Cælestinus (a) coarguit; quibus nempe in litteris vestigatus Veterator ille, deprensus, et tentus, suo se multiloquio labefaciens, dum vera involvens obscuris, rursus utraque confundens vel confiteretur negata, vel niteretur negare confessa. Ad quas depellendas insidias nimium sæpe omni ætate renovatas non alia potior via inita est, quam ut iis exponendis Sententiis, quæ sub latibulo ambiguitatis periculosam, suspiciosamque involvunt discrepantiam sensuum; perversa significatio notaretur; cui subesset error, quem Catholica Sententia reprobaret.

Quam et Nos moderationis plenam rationem eo libentius amplexi sumus, quo magis ad reconciliandos animos, et ad unitatem spiritus in vinculo pacis adducendos, (quod favente Deo in pluribus gaudemus jam feliciter evenisse) magno fore adjumento prospeximus, providere primum, ne per tinacibus, si qui supererunt, quod Deus avertat, Synodi Sectatoribus integrum sic posthac ad novas turbas ciendas, justæ suæ damnationis consortes veluti ac socias sibi adsciscere Scholas Catholicas, quas invitas plane ac repugnantes, per detortam quamdam affinium vocabulorum similitudinem in

(a) S. Cælestinus Ep. 13. n. 2. ap. Conist.

(X)

expressa, quam illæ testantur sententiarum disimilitudine; in partes suas pertrahere nituntur: Deinde si quos imprudentes aliqua fefellit adhuc præconcepta mitior opinio de Synodo; his etiam omnis conquerendi locus præcludatur; qui si recte sapiunt; ut videri volunt; ægre ferre nequeant doctrinas damnari sic denotatas; quæ errores præseferant; à quibus ipsi profitentur se longissime abesse:

Nec dum tamen satis ex animo lenitati nostræ factum putavimus, seu verius caritati; quæ urget Nos erga Fratrem nostrum; cui omni ope volumus, si adhuc possumus subvenire (a): Caritas nempe illa urget Nos, qua inductus Prædecessor noster Cælestinus (b) etiam contra fas, seu majori quam fas esse videretur; patientia Sacerdotes corrigendos expectare non abnuebat. Magis enim cum Augustino; Milevitanisque Patribus volumus, et optamus homines prava docentes pastoralis cura in Ecclesia sanari; quam desperata salute ex illa rescari, si necessitas nulla compellat (c);

Quam ad rem; ne quod genus officii ad lucrandum Fratrem prætermissum videretur, præfatum Episcopum, antequam ad ulteriora progredieremur; amantissimis lit-

(a) S. Cælest. Ep. 14. ad Populum C. P. n. 8. ap. Coust.

(b) Ep. 13. ad Nestor. n. 9.

(c) Epist. 176. num. 4. 178. num. 2. Edit. Maur.

(XI)

teris ad eum jussu nostro datis ad Nos acciendum duximus, polliciti fore, ut benevolento animo a Nobis exciperetur, nec videretur, quin; quæ in rem suam facere sibi viderentur; libere, aperteque expromeret. Nec vero spes Nos omnis deseruerat fieri posse; ut siquidem animum illum docibilem afferret; quem ex Apostoli sententia in Episcopo maxime Augustinus (a) requirebat, cum simpliciter, et candide; omni remota concertatione, et acerbitate recognoscenda ei proponerentur præcipua doctrinarum capita, quæ visa essent majori animadversione digna, tum facile sese ipse colligens non dubitaret; quæ ambigue posita essent; in saniozem sensum exponere, quæve manifestam pravitatem præferrent, aperte repudiare: atque ita magna cum sui nominis existimatione; tum lætissima bonorum omnium gratulatione, pacatissima, qua fieri posset ratione orti in Ecclesia strepitus optatissima correctione comprimerentur (b).

Nunc verò cum ille oblato beneficio incommodæ valetudinis nomine minus utendum sibi esse censuerit, differre jam non possumus, quin Apostolico nostro muneri satisfaciamus. Non unius tantummodo, alteriusve Diœcesis periculum agitur: *Universalis Ecclesia quacumque novitate pulsa-*

(a) *L. 4. de Bapt. cont. Donat. c. 5., et l. 5. c. 26.*

(b) *S. Cælest. Ep. 16, n. 2. ap. Const.*

(XII)

tur (a). Undique jam pridem non expectatur modo, verum assiduis repetitis precibus efflagitatur Supremæ Apostolicæ Sedis iudicium. Absit, ut Vox Petri in illa unquam Sede sua conticescat, in qua perpetuo vivens ille ac præsidens præstat quærentibus fidei veritatem (b). Tuta non est in talibus longior conniventia, quia tantumdem pene criminis est connivere in talibus, quanti est tam irreligiosa prædicare (c). Abscidendum igitur tale vulnus, quo non unum membrum læditur, sed totum Corpus Ecclesiæ sancitur (d). Atque Divina opitulante pietate providendum, ut amputatis dissensionibus fides Catholica inviolata servetur; et his, qui prava defendunt, ab errore revocatis, nostra auctoritate, quorum fides probata fuerit, muniantur (e).

Implorato itaque cum assiduis nostris, tum et piorum Christifidelium privatis publicisque precibus, Spiritus Sancti lumine, omnibus plene et mature consideratis, complures ex Actis et Decretis memoratæ Synodi Propositiones, Doctrinas, Sententias, sive expresse traditas, sive per ambiguitatem insinuatæ, suis, ut præfatum est, cui-

(a) S. Cælest. Ep. 21. ad Episcopos Galliarum.

(b) S. Chrysost. Ep. ad Eurythem.

(c) S. Cælest. Ep. 12. n. 2.

(d) Idem Ep. 11. Cyrillo n. 3.

(e) S. Leo M. Ep. 23. Flaviano C. P. n. 2.

(XIII)

que appositis notis, et censuris damnandas
et reprobandas censuimus, prout hac no-
stra perpetuo valitura Constitutione damna-
mus, et reprobamus:

Sunt autem quæ sequuntur,

De obscuratione veritatum in Ecclesia

Ex Decr. de Grat. §. 1.

- I, Propositio, quæ assertit *postremis hisce
Sæculis sparsam esse generalem obscuratio-
nem super veritates gravioris momenti, spe-
ctantes ad Religionem, et quæ sunt basis
fidei, et moralis doctrinæ Jesu Christi,*

Hæretica.

De Potestate Communitati Ecclesiæ
attributa, ut per hanc Pastoribus
communicetur

Epist. Convoc.

- II. Propositio, quæ statuit *potestatem a Deo
datam Ecclesiæ, ut communicaretur Pasto-
ribus, qui sunt ejus Ministri pro salute
Animarum;*

Sic intellecta ut a Communitate Fide-
lium in Pastores derivetur Ecclesiastici
Ministerii, ac regiminis potestas,

Hæretica.

(XIV)

De Capitis Ministerialis denominatione
Romano Pontifici attributa.

Decr. de Fide §. 8.

III. Insuper quæ statuit *Romanum Pontificem esse caput Ministeriale* ;

Sic explicata , ut Romanus Pontifex non a Christo in Persona B. Petri , sed ab Ecclesia potestatem Ministerii accipiat , qua velut Petri Successor , verus Christi Vicarius , ac totius Ecclesiæ Caput pollet in universa Ecclesia ,

Hæretica .

De potestate Ecclesiæ quoad constituendam , et sanciendam exteriorem disciplinam ,

Decr. de Fide §§. 13. 14.

IV. Propositio affirmans , *abusum fore auctoritatis Ecclesiæ transferendo illam ultra limites doctrinæ , ac morum , et eam extendendo ad res exteriores , et per vim exigendo id quod pendet a persuasione , et corde , tum etiam , multo minus ad eam pertinere , exigere per vim exteriorem subjectionem suis Decretis* ;

Quatenus indeterminatis illis verbis extendendo ad res exteriores notet velut abu-

(XV)

sum auctoritatis Ecclesiæ , usum ejus potestatis acceptæ a Deo , qua usi sunt et ipsimet Apostoli in disciplina exteriori constituenda , et sancienda ,

Hæretica ,

V. Qua parte insinuat , Ecclesiam non habere auctoritatem subjectionis suis Decretis exigendæ aliter quam per media , quæ pendent a persuasionē ;

Quatenus intendat Ecclesiam *non habere collatam sibi a Deo potestatem non solum dirigendi per consilia , et suasiones , sed etiam jubendi per leges , ac devios , contumacesque exteriori judicio , ac salubribus pœnis coercendi , atque cogendi ,*

Ex Bened. XIV. in Brevi *Ad assiduas* . anni 1755 Primate , Archiepiscopis , et Episcopis Regni Polon.

Inducens in Systema alias damnatum ut hæreticum .

Jura Episcopis præter fas attributa .

Decr. de Ord. §. 25.

VI. Doctrina Synodi , qua profitetur *persuasum sibi esse , Episcopum accepisse a Christo omnia jura necessaria pro bono regimine suæ Diœcesis ;*

Perinde ac si ad bonum regimen cujusque Diœcesis necessariæ non sint supe-

(XVI)

riores ordinationes spectantes sive ad fidem , et mores , sive ad generalem disciplinam , quarum jus est penes Summos Pontifices , et Concilia Generalia pro universa Ecclesia ,

Schismatica , ad minus erronea .

- VII. Item in eo quod hortatur Episcopum *ad prosequendam naviter perfectiorem Ecclesiasticæ disciplinæ Constitutionem* , idque , *contra omnes contrarias consuetudines , exemptiones , reservationes , quæ adversantur bono ordini Diæcesis , majori gloriæ Dei , et majori ædificationi Fidelium ;*

Per id quod supponit Episcopo fas esse proprio suo iudicio , et arbitrato statuere , et decernere contra consuetudines , exemptiones , reservationes , sive quæ in universa Ecclesia , sive etiam in unaquaque Provincia locum habent ; sine venia , et interventu Superioris hierarchicæ potestatis , a qua inductæ sunt , aut probatæ , et vim legis obtinent ,

Inducens in Schisma , et Subversionem hierarchici regiminis , erronea ,

- VIII. Item quod et sibi persuasum esse ait ; *Jura Episcoporum a J. C. accepta pro gubernanda Ecclesia nec alterari , nec impediri posse ; et ubi contigerit horum jurium exercitium quavis de causa fuisse interruptum ,*

(XVII)

posse semper Episcopum, ac debere in originaria sua jura regredi, quotiescumque id exigit majus bonum suæ Ecclesiæ;

In eo quod innuit jurium Episcopaliū exercitium nulla Superiori Potestate præpediri, aut coerceri posse, quandocumque Episcopus proprio judicio censuerit minus id expedire majori bono suæ Ecclesiæ,

Inducens in Schisma, et Subversionem hierarchici regiminis, erronea.

Jus perperam tributum inferioris Ordinis Sacerdotibus in Decretis fidei, et disciplinæ.

Epist. Convoc.

IX. *Doctrina, quæ statuit, reformationem abusuum circa Ecclesiasticam disciplinam in Synodis Diæcesanis ab Episcopo, et Parochis æqualiter pendere, ac stabiliri debere: ac sine libertate decisionis indebitam fore subjectionem suggestionibus, et jussionibus Episcoporum,*

Falsa, temeraria, Episcopalis auctoritatis læsiva, regiminis hierarchici Subversiva, favens hæresi Acrianæ a Calvino innovatæ.

Ex Ep. Convoc. Ex Ep. ad Vic. For. Ex Orat. ad Syn. §. 8. Ex Sess. 3.

(XVIII)

X. Item doctrina , qua Parochi , aliive Sacerdotes in Synodo congregati pronuntiantur una cum Episcopo Iudices Fidei , et simul innuitur iudicium in causis fidei ipsis competere jure proprio , et quidem etiam per ordinationem accepto ,

Falsa , temeraria , Ordinis hierarchici subversiva , detrahens firmitati Definitionum , judiciorumve dogmaticorum Ecclesiæ , ad minus erronea .

Orat. Synod. §. 8.

XI. Sententia enuntians veteri Majorum instituto ab Apostolicis usque temporibus ducto , per meliora Ecclesiæ Sæcula servato , receptum fuisse *ut decreta , aut definitiones , aut sententiæ etiam majorum Sedium non acceptarentur , nisi recognitæ fuissent , et approbatæ a Synodo Diocesana ,*

Falsa , temeraria , derogans pro sua generalitate obedientiæ debitæ Constitutionibus Apostolicis , tum et Sententiis ab hierarchica superiore legitima potestate manantibus , Schisma fovens , et hæresim .

(XIX)

Calumniæ adversus aliquas decisiones
in materia Fidei ab aliquot sæculis
emanatas .

De Fide §.12.

XII. Assertiones Synodi complexive acceptæ
circa Decisiones in materia fidei ab aliquot
Sæculis emanatas , quas perhibet velut De-
creta ab una particulari Ecclesia , vel pau-
cis Pastoribus profecta , nulla sufficienti
auctoritate suffulta , nata corrumpendæ pu-
ritati fidei , ac turbis excitandis , intrusa
per vim , e quibus inflicta sunt vulnera ni-
mum adhuc recentia ,

Falsæ , captiosæ , temerariæ , scandalo-
sæ , in Romanos Pontifices et Eccle-
siam injuriosæ , debitæ Apostolicis
Constitutionibus obedientiæ derogan-
tes , Schismaticæ , perniciosæ , ad mi-
nus erroneæ .

De Pace dicta Clementis IX.

Or. Synod. §.2. in nota .

XIII. Propositio relata inter acta Synodi ,
quæ innuit Clementem IX. pacem Ecclesiæ
reddidisse per approbationem distinctionis
juris , et facti in subscriptione Formularii
ab Alexandro VII. præscripti ,

Falsa , temeraria , Clementi IX. injuriosa .

XIV. Quatenus vero ei distinctioni suffragatur , ejusdem fautores laudibus extollendo , et eorum Adversarios vituperando ,

Temeraria , perniciosa , Summis Pontificibus injuriosa , Schisma fovens , et hæresim .

De Coagmentatione Corporis Ecclesiæ.

Append. n. 28.

XV. Doctrina , quæ proponit Ecclesiam *considerandam velut unum Corpus Mysticum coagmentatum ex Christo Capite , et Fidelibus , qui sunt ejus membra per unionem ineffabilem , qua mirabiliter evadimus cum ipso unus solus Sacerdos , una sola Victima , unus solus Adorator perfectus Dei Patris in Spiritu , et Veritate ;*

Intellecta hoc sensu , ut ad Corpus Ecclesiæ non pertineant nisi Fideles , qui sunt perfecti Adoratores in Spiritu , et Veritate ,

Hæretica .

De Statu innocentiae .

*De Grat. §§. 4. 7. De Sacr. in gen. §. 1.
De Panit. §. 4.*

(XXI)

XVI. Doctrina Synodi de statu felicitis innocentiae, qualem eum repræsentat in Adamo ante peccatum, complectente non modo integritatem, sed et justitiam interiorem cum impulsu in Deum per amorem caritatis, atque primævam Sanctitatem aliqua ratione post lapsum restitutam;

Quatenus complexive accepta innuit statum illum sequelam fuisse Creationis, debitum ex naturali exigentia, et conditione humanæ naturæ, non gratuitum Dei beneficium,

Falsa, alias damnata in Bajo, et Quesnellio, erronea, favens hæresi Pelagianæ.

De immortalitate spectata ut naturali
conditione hominis.

De Bapt. §. 2.

XVII. Propositio his verbis enuntiata: *Edocti ab Apostolo spectamus mortem non jam ut naturalem conditionem hominis, sed revera ut justam pœnam culpæ originalis;*

Quatenus sub nomine Apostoli subdole allegato insinuat, mortem, quæ in præsentī statu inflicta est velut justa pœna peccati per justam subtractionem immortalitatis, non fuisse naturalem conditionem hominis, quasi immortalitas non fuis-

(XXII)

set gratuitum beneficium , sed naturalis
conditio ,

Captiosa , temeraria , Apostolo injurio-
sa , alias damnata ,

De conditione hominis in statu naturæ.

De Grat. §. 10.

XVIII. Doctrina Synodi enuntians *post lapsum Adami Deum annuntiasse promissionem futuri Liberatoris , et voluisse consolari genus humanum per spem salutis , quam J.C. allaturus erat , tamen Deum voluisse ut genus humanum transiret per varios status , antequam veniret plenitudo temporum , ac primum ut in statu naturæ homo relictus propriis luminibus disceret de sua cæca ratione diffidere , et ex suis aberrationibus moveret se ad desiderandum auxilium superioris luminis ,*

Doctrina , ut jacet , captiosa , atque intellecta de desiderio adjutorii superioris luminis in ordine ad salutem promissam per Christum , ad quod concipiendum homo relictus suis propriis luminibus supponatur se se potuisse movere ,

Suspecta , favens hæresi Semipelagianæ.

(XXIII)

De conditione hominis sub lege .

Ibid.

XIX. Item quæ subjungit , hominem sub lege cum esset impotens ad eam observandam prævaricatorem evasisse , non quidem culpa legis , quæ SSi^ma erat , sed culpa hominis , qui sub lege sine gratia magis magisque prævaricator evasit , superadditque , legem , si non sanavit cor hominis , effecisse , ut sua mala cognosceret , et de sua infirmitate convictus desideraret gratiam Mediatoris ;

Qua parte generaliter innuit hominem prævaricatorem evasisse per inobservantiam legis , quam impotens esset observare ; quasi impossibile aliquid potuerit imperare qui justus est , aut damnaturus sit hominem pro eo quod non potuit vitare , qui pius est ,

Ex S. Cæsario Serm. 73. in Append.

S. Augustini Serm. 273. Edit. Maur.

Ex S. Aug. de Nat. et Gr. c. 43.

De Grat. et lib. arb. c. 16.

Enar. in Psal. 56. n. 1.

Falsa , scandalosa , impia , in Bajo damnata .

XX. Qua parte datur intelligi , hominem sub lege sine gratia potuisse concipere desiderium gratiæ Mediatoris ordinatum ad salutem promissam per Christum ; quasi

(XXIV)

non ipsa gratia faciat ut invocetur a nobis ,
Ex Concil. Araus. II. Can. 3.

Propositio , ut jacet , captiosa , sus-
pecta , favens hæresi Semipelagianæ .

De gratia illuminante , et excitante .

De Gratia §. II.

XXI. *Propositio , quæ asserit , lumen gra-
tiæ , quando sit solum , non præstare , nisi
ut cognoscamus infelicitatem nostri status ,
et gravitatem nostri mali : Gratiam in tali
casu producere eundem effectum , quem lex
producebat : Ideo necesse esse , ut Deus creet
in corde nostro sanctum amorem , et inspiret
sanctam delectationem contrariam amoris in
nobis dominanti : hunc amorem sanctum ,
hanc sanctam delectationem esse proprie gra-
tiam J. C. , inspirationem caritatis , qua co-
gnita sancto amore faciamus ; hanc esse il-
lam radicem , e qua germinant bona opera ,
hanc esse gratiam novi Testamenti , quæ
nos liberat a servitute peccati , et constituit
Filios Dei ;*

Quatenus intendat eam solam esse pro-
prie gratiam Jesu Christi , quæ creet in
corde sanctum amorem , et quæ facit ut
faciamus , sive etiam qua homo liberatus
a servitute peccati constituitur Filius Dei ,
et non sit etiam proprie gratia Christi ea
gratia , qua cor hominis tangitur per illu-

(XXV)

minationem Spiritus Sancti (Trid. sess. 6. cap. 5.), nec vera detur interior gratia Christi, cui resistitur,

Falsa, captiosa, inducens in errorem in secunda propositione Jansenii damnatum ut hæreticum, eumque renovans.

De Fide velut prima Gratia.

De Fide §. 1.

XXII. Propositio, quæ innuit, Fidem, & qua incipit series gratiarum, et per quam velut primam vocem vocamur ad salutem, et Ecclesiam, esse ipsammet excellentem virtutem fidei, qua homines fideles nominantur, et sunt;

Perinde ac prior non esset gratia illa, quæ ut prævenit voluntatem, sic prævenit et fidem,

Ex S. Aug. de dono persever. c. 16. n. 41.

Suspecta de hæresi, eamque sapiens, alias in Quesnellio damnata, erronea.

De duplici Amore.

De Grat. §. 2.

XXIII. Doctrina Synodi de duplici amore dominantis cupiditatis, et caritatis dominantis, enuntians hominem sine gratia esse sub servitute peccati: ipsumque in

(XXVI)

eo statu per generalem cupiditatis dominantis influxum omnes suas actiones inficere , et corrumpere ;

Quatenus insinuat in homine , dum est sub servitute , sive in statu peccati , destitutus gratia illa , qua liberatur a servitute peccati , et constituitur Filius Dei , sic dominari cupiditatem , ut per generalem hujus influxum omnes illius actiones in se inficiantur , et corrumpantur : aut opera omnia , quæ ante justificationem sunt , quacumque ratione fiant , sint peccata ;

Quasi in omnibus suis actibus peccator serviat dominanti cupiditati ,

Falsa , perniciosa , inducens in errorem
a Tridentino damnatum ut hæreticum ,
iterum in Bajo damnatum art.40.

§. 12.

XXIV. Qua vero parte inter dominantem cupiditatem , et caritatem dominantem nulli ponuntur affectus medii a natura ipsa insiti , suapteque natura laudabiles , qui una cum amore beatitudinis , naturalique propensione ad bonum remanserunt velut extrema lineamenta , et reliquæ imaginis Dei ;

Ex S. August. de Spir. et Litt. c. 28.

Perinde ac si inter dilectionem Divinam ,
quæ nos perducit ad regnum , et dilectionem

(XXVII)

humanam illicitam , quæ damnatur , non daretur dilectio humana licita , quæ non reprehenditur ,

Ex S. Aug. Ser. 349. de Carit. Edit. Maur.

Falsa , alias damnata .

De Timore servill .

De Pœnit. §. 3.

XXV. Doctrina , quæ timorem pœnarum generatim perhibet *duntaxat non posse dici malum , si saltem pertingit ad cohibendam manum ;*

Quasi timor ipse gehennæ , quam fides docet peccato infligendam , non sit in se bonus , et utilis , velut donum supernaturale , ac motus a Deo inspiratus præparans ad amorem justitiæ ,

Falsa , temeraria , perniciosa , Divinis Donis injuriosa , alias damnata , contraria doctrinæ Concilii Tridentini , tum et communi Patrum Sententiæ , *opus esse juxta consuetum ordinem præparationis ad justitiam , ut intret timor primo , per quem veniat Caritas ; Timor medicamentum , Caritas sanitas .*

Ex S. August. in Epist. Johan. c. 4. Tract. 9.
n. 4. 5.

In Johan. Evang. Tract. 41. n. 10.
Enarratione in Psal. 127. n. 7.

(XXVIII)

Sermone 157. de Verbis Apostoli c.13.

Sermone 161. de Verbis Apostoli n.8.

Sermone 349. de Caritate n. 7.

**De pœna decedentium cum solo
Originali .**

De Bapt. §. 3.

XXVI. Doctrina , quæ velut fabulam Pelagianam explodit locum illum inferorum, (quem Limbi puerorum nomine Fideles passim designant) in quo animæ decedentium cum sola originali culpa pœna damni citra pœnam ignis puniantur ;

Perinde ac si hoc ipso quod qui pœnam ignis remouent , inducerent locum illum , et statum medium expertem culpæ , et pœnæ inter regnum Dei , et damnationem æternam , qualem fabulabantur Pelagiani ,

Falsa , temeraria , in scholas Catholicas injuriosa .

**De Sacramentis , ac primum de forma
Sacramentali cum adjuncta
conditione .**

De Bapt. §. 12.

XXVII. Deliberatio Synodi , qua prætextu adhæSIONIS ad antiquos Canones in casu

(XXIX)

dubii Baptismatis propositum suum declarat de omittenda formæ conditionalis mentione ,

Temeraria , praxi , legi , auctoritati Ecclesiae contraria .

De participatione Victimæ
in Sacrificio Missæ .

De Euch. §.6.

XXVIII. Propositio Synodi , qua postquam statuit *Victimæ participationem esse partem Sacrificio essentialem* , subjungit , *non tamen se damnare ut illicitas Missas illas , in quibus Adstantes Sacramentaliter non communicant , ideo quia isti participant licet minus perfecte de ipsa Victima , spiritu illam recipiendo ;*

Quatenus insinuat ad Sacrificii essentialiam deesse aliquid in eo Sacrificio , quod peragatur sive nullo adstante , sive adstantibus , qui nec Sacramentaliter , nec spiritaliter de Victima participant : Et quasi damnandæ essent ut illicitæ Missæ illæ , in quibus solo Sacerdote communicante , nemo adsit , qui sive Sacramentaliter , sive spiritaliter communicet ;

Falsa , erronea , de hæresi suspecta ;
eamque sapiens .

De Ritus Consecrationis efficacia .

De Euch. §.2.

XXIX. Doctrina Synodi , qua parte tradere instituens fidei doctrinam de ritu Consecrationis , remotis quæstionibus Scholasticis circa modum , quo Christus est in Eucharistia , a quibus Parochos docendi munere fungentes abstinere hortatur , duobus his tantum propositis : 1. Christum post Consecrationem vere , realiter , substantialiter esse sub speciebus : 2. Tunc omnem Panis , et Vini substantiam cessare solis remanentibus speciebus , prorsus omittit ullam mentionem facere transubstantiationis , seu conversionis totius substantiæ panis in Corpus , et totius substantiæ Vini in Sanguinem , quam velut articulum fidei Tridentinum Concilium definivit , et quæ in solempni Fidei professione continetur ;

Quatenus per inconsultam istiusmodi , suspiciosamque omissionem notitia subtrahitur tum articuli ad fidem pertinentis , tum etiam vocis ab Ecclesia consecratæ ad illius tuendam professionem adversus hæreses , tenditque adeo ad ejus oblivionem inducendam , quasi ageretur de quæstione mere scholastica ,

Perniciosa , derogans expositioni veritatis Catholicæ circa Dogma transubstantiationis , favens hæreticis .

De applicatione fructus Sacrificii.

De Euch. §. 8.

XXX. Doctrina Synodi , qua dum profitetur credere Sacrificii oblationem extendere se ad omnes , ita tamen ut in Liturgia fieri possit specialis commemoratio aliquorum tam vivorum , quam defunctorum , precando Deum peculiariter pro ipsis ; dein continuo subjicit : Non tamen quod credamus in arbitrio esse Sacerdotis applicare fructus Sacrificii cui vult ; immo damnamus hunc errorem velut magnopere offendentem jura Dei ; qui solus distribuit fructus Sacrificii cui vult , et secundum mensuram , quæ ipsi placet : Unde et consequenter traducit velut falsam opinionem invecam in populum , quod illi , qui eleemosynam subministrant Sacerdoti sub conditione , quod celebret unam Missam , specialem fructum ex ea percipiant ;

Sic intellecta , ut præter peculiarem commemorationem , et orationem specialis ipsa oblatio , seu applicatio Sacrificii , quæ fit a Sacerdote , non magis prosit , ceteris paribus , illis , pro quibus applicatur , quam aliis quibusque ; quasi nullus specialis fructus proveniret ex speciali applicatione , quam pro determinatis personis , aut personarum ordinibus faciendam commendat , ac præcipit Ecclesia , speciatim a Pastoribus pro suis ovibus ; quod velut ex Divino præcepto descen-

(XXXII)

dens a Sacra Tridentina Synodo diserte
est expressum ,

Sess. 23. c. 1. de Reform.

Bened. XIV. Constit. *Cum semper obla-*
tas . §. 2.

Falsa , temeraria , perniciosa , Ecclesiæ
injuriosa , inducens in errorem alias
damnatum in Wicleffo .

De convenienti ordine in cultu
servando .

De Euch. §. 5.

XXXI. Propositio Synodi enuntians conve-
niens esse pro Divinorum Officiorum ordi-
ne , et antiqua consuetudine , ut in uno-
quoque Templo unum tantum sit Altare ,
sibique adeo placere morem illum resti-
tuere ,

Temeraria , perantiquo , pio , multis ab
hinc Sæculis in Ecclesia præsertim
Latina vigenti , et probato mori inju-
riosa .

Ibid.

XXXII. Item præscriptio vetans , ne super
Altaria Sacrarum Reliquiarum thecæ , flo-
resve apponantur ,

Temeraria , pio , ac probato Ecclesiæ
mori injuriosa .

Ibid. §. 6.

XXXIII. Propositio Synodi qua cupere se ostendit, ut causæ tollerentur, per quas ex parte inducta est oblivio principiorum ad Liturgiæ ordinem spectantium, *revocando illam ad majorem rituum simplicitatem, eam vulgari lingua exponendo, et elata voce proferendo;*

Quasi vicens ordo Liturgiæ ab Ecclesia receptus, et probatus aliqua ex parte manasset ex oblivione principiorum, quibus illa regi debet,

Temeraria, piarum aurium offensiva, in Ecclesiam contumeliosa, favens hæreticorum in eam conviciis.

De Ordine Pœnitentiæ.

De Pœnit. §. 7.

XXXIV. Declaratio Synodi, qua postquam præmisit ordinem pœnitentiæ Canonice sic ad Apostolorum exemplum ab Ecclesia statutum fuisse, ut esset communis omnibus, nec tantum pro punitione culpæ, sed præcipue pro dispositione ad gratiam, subdit, se *in ordine illo mirabili, et augusto totam agnoscere dignitatem Sacramenti adeo necessarii, liberam a subtilitatibus, quæ ipsi decursu temporis adjunctæ sunt;*

Quasi per ordinem, quo sine peracto

(XXXIV)

canonicæ pœnitentiæ cursu hoc Sacramentum per totam Ecclesiam administrari consuevit , illius fuisse dignitas imminuta ,

Temeraria , scandalosa , inducens in contemptum dignitatis Sacramenti , prout per Ecclesiam totam consuevit administrari , Ecclesiæ ipsi injuriosa .

De Pœnit. §. 10. n. 4.

XXXV. *Propositio his verbis concepta : Si Caritas in principio semper debilis est , de via ordinaria ad obtinendum augmentum hujus Caritatis , oportet ut Sacerdos præcedere faciat eos actus humiliationis , et pœnitentiæ , qui fuerunt omni ætate ab Ecclesia commendati ; redigere hos actus ad paucas orationes , aut ad aliquod jejunium post jam collatam absolutionem videtur potius materiale desiderium conservandi huic Sacramento nudum nomen pœnitentiæ , quam medium illuminatum , et aptum ad augendum illum fervorem caritatis , qui debet præcedere absolutionem ; Longe quidem absumus ab improbanda praxi imponendi pœnitentias etiam post absolutionem adimplendas : Si omnia nostra bona opera semper adjunctos habent nostros defectus , quanto magis vereri debemus , ne plurimas imperfectiones admiserimus in difficillimo , et magni momenti opere nostræ reconciliationis ; Quatenus innuit pœnitentias , quæ imponuntur adimplendæ post absolutionem ,*

(XXXV)

spectandas potius esse velut supplementum pro defectibus admissis in opere nostræ reconciliationis , quam ut pœnitentias vere Sacramentales , et satisfactorias pro peccatis confessis : quasi ut vera ratio Sacramenti non nudum nomen servetur , oporteat de via ordinaria , ut actus humiliationis , et pœnitentiæ , qui imponuntur per modum satisfactionis Sacramentalis præcedere debeant absolutionem ,

Falsa , temeraria , communi praxi Ecclesiæ injuriosa , inducens in errorem hæreticali nota in Petro de Osma confixum .

De prævia necessaria dispositione pro admittendis pœnitentibus ad reconciliationem .

De Grat. §. 15.

XXXVI. Doctrina Synodi , qua postquam præmisit : *Quando habebuntur signa non æquivoca amoris Dei dominantis in corde hominis , posse illum merito judicari dignum , qui admittatur ad participationem Sanguinis Jesu Christi , quæ fit in Sacramentis* , subdit , *supposititias conversiones , quæ fiunt per attritionem nec efficaces esse solere , nec durabiles : Consequenter Pastorem Animarum debere insistere signis* .

(XXXVI)

non æquivocis caritatis dominantis , antequam admittat suos pœnitentes ad Sacramenta , quæ signa , ut deinde tradit (§. 17.) Pastor deducere poterit ex stabili cessatione a peccatò , et fervore in operibus bonis , quæ insuper fervorem caritatis perhibet (de Pœnit. §. 10.) velut dispositionem , quæ debet præcedere absolutionem ;

Sic intellecta , ut non solum Contritio imperfecta , quæ passim attritionis nomine donatur , etiam quæ juncta sit cum dilectione , qua homo incipit diligere Deum tanquam omnis justitiæ fontem , nec modo Contritio caritate formata , sed et fervor caritatis dominantis , et ille quidem diuturno experimento per fervorem in operibus bonis probatus , generaliter , et absolute requiratur , ut homo ad Sacramenta , et speciatim pœnitentes ad absolutionis beneficium admittantur ,

Falsa , temeraria , quietis animarum perturbativa , tutæ , ac probatæ in Ecclesia praxi contraria , Sacramenti efficaciam detrahens , et injuriosa .

De auctoritate absolvendi .

De Pœnit. §. 10. n. 6.

XXXVII. *Doctrina Synodi , quæ de auctoritate absolvendi accepta per ordinationem enunciat , post institutionem Diæcesium ,*

(XXXVII)

*et Parochiarum conveniens esse , ut quisque
judicium hoc exerceat super personas sibi
subditas sive ratione territorii , sive jure
quodam personali , propterea quod aliter
confusio induceretur ; et perturbatio ;*

Quatenus post institutas Diöceses , et
Parochias enuntiat tantummodo ; *conve-
niens esse ad præcavendam confusionem ,
ut absolvendi potestas exerceatur super Sub-
ditos ; sic intellecta tanquam ad validum
usum hujus potestatis non sit necessaria
ordinaria , vel subdelegata illa jurisdictio ,
sine qua Tridentinum declarat nullius
momenti esse absolutionem a Sacerdote
prolatam ;*

*Falsa , temeraria , perniciosa , Triden-
tino contraria ; et injuriosa , erronea .*

Ibid. §. ii.

XXXVIII. Item doctrina , qua postquam
Synodus professæ est , *se non posse non
admirari illam adeo venerabilem disciplinam
antiquitatis , quæ , ut ait , ad pænitentiam
non ita facile , et forte nunquam eum ad-
mittebat , qui post primum peccatum , et
primam reconciliationem relapsus esset in
culpam ,* subjungit , *per timorem perpetuæ
exclusionis a communione , et pace , etiam
in articulo mortis magnum frænum illis
injectum iri , qui parum considerant malum
peccati , et minus illud timent ,*

(XXXVIII)

Contraria Can. 13. Concilii Nicæni I. ;
Decretali Innocentii I. ad Exuperium
Tholos. , tum et Decretali Cælesti-
ni I. ad Episcopos Viennen. et Nar-
bonen. Provinciæ , redolens pravita-
tem , quam in ea Decretali Sanctus
Pontifex exhorret .

De peccatorum venialium confessione .

De Pœnit. §. 12.

XXXIX. Declaratio Synodi de peccatorum
venialium confessione , quam optare se
ait non tantopere frequentari , ne nimium
contemptibiles reddantur ejusmodi con-
fessiones ,

Temeraria , perniciosa , Sanctorum , ac
piorum praxi a S. Conc. Trid. proba-
tæ contraria .

De Indulgentiis .

De Pœnit. §. 16.

XL. Propositio asserens , *indulgentiam se-
cundum suam præcisam notionem aliud non
esse quam remissionem partis ejus pœniten-
tiæ , quæ per Canones statuta erat peccanti ;*
Quasi indulgentia præter nudam remis-
sionem pœnæ Canonice non etiam valeat
ad remissionem pœnæ temporalis pro pec-

(XXXIX)

catis actualibus debitæ apud Divinam
justitiam,

Falsa, temeraria, Christi meritis inju-
riosa, dudum in Artic. 19. Lutheri
damnata.

Ibid.

XLi. Item in eo quod subditur, *Scholasti-
cos suis subtilitatibus inflatos invexisse the-
saurum male intellectum meritorum Christi,
et Sanctorum, et claræ notioni absolutionis
a pena canonica substituisse confusam, et
falsam applicationis meritorum;*

Quasi thesauri Ecclesiæ, unde Papa
dat indulgentias non sint merita Christi,
et Sanctorum,

Falsa, temeraria, Christi, et Sancto-
rum meritis injuriosa, dudum in
Art. 17. Lutheri damnata.

Ibid.

XLii. Item in eo quod superaddit, *luctuosius
adhuc esse quod chimeræ isthæc applicatio
transferri volita sit in defunctos,*

Falsa, temeraria, piarum aurium of-
fensiva, in Romanos Pontifices, et in
praxim, et sensum universalis Ec-
clesiæ injuriosa, inducens in errorem
hæreticali nota in Petro de Osma con-
fixum, iterum damnatum in Art. 22.
Lutheri.

Ibid.

XLIII. In eo demum quod impudentissime invehitur in Tabellās indulgentiarum, Altaria privilegiata &c.,

Temeraria, plarum aurium offensiva; scandalosa, in Summos Pontifices; atque in praxim tota Ecclesia frequentatam contumeliosa.

De reservatione Casuum:

De Pœnit. §. 19:

XLIV. *Propositio Synodi asserens, reservationem casuum nunc temporis aliud non esse quam improvidum ligamen pro inferioribus Sacerdotibus, et sonum sensu vacuum pro pœnitentibus assuetis non admōdum curare hanc reservationem,*

Falsa, temeraria, male sonans, pernicioſa, Concilio Tridentino contraria; superioris hierarchicæ potestatis læsiva.

Ibid.

XLV. *Item de spe quam ostendit fore, ut reformato Rituali, et ordine pœnitentiæ nullum amplius locum habituræ sint hujusmodi reservationes;*

Prout attenta generalitate verborum innuit per reformationem Ritualis, et ordinis pœnitentiæ factam ab Episcopo,

(XLI)

vel Synodo aboleri posse Casus ; quos
Tridentina Synodus (Sess. 14. c. 7.) de-
clarat Pontifices Maximos potuisse pro
Suprema Potestate sibi in universa Eccle-
sia tradita peculiari suo iudicio reservare ,

Propositio falsa , temeraria , Concilio
Tridentino , et Summorum Pontificum
auctoritati derogans , et injuriosa .

De Censuris :

De Penit. §§. 20. 22.

XLVI. Propositio asserens , *effectum excom-
municationis exteriorem duntaxat esse , quia
tantummodo natura sua excludit ab exte-
riore communicatione Ecclesiæ ;*

Quasi excommunicatio non sit poena
spiritualis , ligans in Cœlo , animas obli-
gans ,

Ex S. Aug. Ep. 250. Auxilio Episcopo :
Tract. 50. in Johan. n. 12.

Falsa , perniciosa , in Art. 23. Lutheri
damnata , ad minus erronea .

§§. 21. 23.

XLVII. Item quæ tradit , necessarium esse
juxta leges naturales , et Divinas , ut sive
ad excommunicationem , sive ad suspensio-
nem præcedere debeat examen personale , at-
que adeo sententias dictas *ipso facto* , non

(XLII)

aliā vim habere , nisi seriæ comminationis sine ullo actuali effectu ,

Falsa , temeraria , perniciosa , Ecclesiæ potestati injuriosa , erronea :

§. 22.

XLVIII. Item quæ pronuntiat , *inutilem ; ac vanam esse formulam nonnullis abhinc Sæculis inductam absolvendi generaliter ab excommunicationibus , in quas Fidelis incidere potuisset ;*

Falsa , temeraria , praxi Ecclesiæ injuriosa :

§. 24.

XLIX. Item quæ damnat ut nullas , et invalidas *suspensiones ex informata conscientia ,*

Falsa , perniciosa , in Trid. injuriosa .

Ibid.

L. Item in eo quod insinuat soli Episcopo fas non esse uti potestate , quam tamen ei defert Tridentinum (Sess. 14. c. 1. de Ref.) suspensionis *ex informata conscientia* legitime infligendæ ,

Jurisdictionis Prælatorum Ecclesiæ læsiva .

De Ordine:

De Ordine §. 4.

- LI. Doctrina Synodi, quæ perhibet, in promovendis ad Ordines hanc de more, et instituto veteris disciplinæ rationem servari consuevisse; ut *si quis Clericorum distinguebatur sanctitate vitæ, et dignus æstimabatur, qui ad Ordines Sacros ascenderet, ille solitus erat promoveri ad Diaconatum, vel Sacerdotium, etiamsi inferiores Ordines non suscepisset: neque tum talis Ordinatio dicebatur per saltum, ut postea dictum est;*

§. 5.

- LII. Item quæ innuit non alium titulum Ordinationum fuisse, quam deputationem ad aliquod speciale Ministerium, qualis præscripta est in Concilio Calcedonensi: subjungens (§. 6.), quamdiu Ecclesia sese his principiis in delectu Sacrorum Ministrorum conformavit, Ecclesiasticum Ordinem floruisse; verum beatos illos dies transiisse, novaque principia subinde introducta, quibus corrupta fuit disciplina in delectu Ministrorum Sanctuarii;

§. 7.

- LIII. Item quod inter hæc ipsa corruptionis principia refert, quod recessum sit a veteri instituto, quo, ut ait (§. 3.), Ec-

(XLIV)

clesia insistens Apostoli vestigiis neminem ad Sacerdotium admittendum statuerat , nisi qui conservasset innocentiam baptismalem ;

Quatenus innuit corruptam fuisse disciplinam per decreta , et instituta ,

1. Sive quibus Ordinationes per saltum veritæ sunt ,

2. Sive quibus pro Ecclesiarum necessitate , et commoditate probatæ sunt Ordinationes sine titulo specialis officii , velut speciatim a Tridentino Ordinatio ad titulum patrimonii : Salva obedientia , qua sic Ordinati Ecclesiarum necessitatibus deservire debent iis obeundis officiis , quibus pro loco , ac tempore ab Episcopo admoti fuerint , quemadmodum ab Apostolicis temporibus in primitiva Ecclesia fieri consuevit ,

3. Sive quibus jure canonico facta est criminum distinctio , quæ delinquentes reddunt irregulares : Quasi per hanc distinctionem Ecclesia recesserit a spiritu Apostoli , non excludendo generaliter , et indistincte ab Ecclesiastico Ministerio omnes quoscunque , qui baptismalem innocentiam non conservassent ,

Doctrina singulis suis partibus falsa ;
temeraria , Ordinis pro Ecclesiarum
necessitate , et commoditate inducti
perturbativa , in disciplinam per Ca-

(XLV)

ones , et speciatim per Trid. Decreta probatam injuriosa .

§. 13.

LIV. Item quæ velut turpem abusum notat unquam prætere eleemosynam pro celebrandis Missis , et Sacramentis ministrandis , sicuti et accipere quemlibet proventum dictum *Stolæ* , et generatim quodcumque stipendium et honorarium , quod suffragiorum , aut cujuslibet Parochialis functionis occasione offerretur ;

Quasi turpis abusus crimine notandi essent Ministri Ecclesiæ , dum secundum receptum , et probatum Ecclesiæ morem , et institutum utuntur jure promulgato ab Apostolo accipiendi temporalia ab his , quibus spiritualia ministrantur ,

Falsa , temeraria , Ecclesiastici , ac Pastoralis juris læsiva , in Ecclesiam , ejusque Ministros injuriosa .

§. 14.

LV. Item qua vehementer optare se proficetur , ut aliqua ratio inveniretur minutuli Cleri (quo nomine inferiorum ordinum Clericos designat) a Cathedralibus , et Collegiatis submovendi , providendo aliter , nempe per probos , et profectionis ætatis Laicos , congruo assignato stipendio , ministerio inserviendi Missis , et aliis Officiis velut Acolythi etc. , ut olim ,

(XLVI)

inquit , fieri solebat , quando ejus generis Officia , non ad meram speciem pro majoribus ordinibus suscipiendis redacta erant ;

Quatenus reprehendit institutum , quo cavetur , ut *minorum Ordinum functiones per eos tantum præstentur , exerceanturve , qui in illis constituti , adscriptive sunt* (Concil. Prov. iv. Mediol.) : idque ad mentem Tridentini (Sess. 23 c. 17.) , ut *Sanctorum Ordinum a Diaconatu ad Ostiariatum functiones ab Apostolicis temporibus in Ecclesia laudabiliter receptæ , et in pluribus locis aliquandiu intermissæ juxta Sacros Canones revocentur , nec ab hæreticis tanquam otiosæ traducantur ,*

Suggestio temeraria , piarum aurium offensiva , Ecclesiastici Ministerii perturbativa , servandæ , quoad fieri potest , in celebrandis Mysteriis decentiæ imminutiva , in Minorum Ordinum munera , et functiones , tum in disciplinam per Canones , et speciatim per Trid. probatam injuriosa , favens hæreticorum in eam conviciis , et calumniis .

§. 18.

LVI. Doctrina , quæ statuit conveniens videri in impedimentis Canonicis , quæ proveniunt ex delictis in jure expressis ul-

(XLVII)

Iam unquam nec concedendam, nec admittendam esse dispensationem.

Æquitatis, et moderationis canonicæ a Sacro Concilio Tridentino probatæ læsiva, auctoritati, et juribus Ecclesiæ derogans.

Ibid. §. 22.

LVII. Præscriptio Synodi, quæ generaliter, et indiscriminatim velut abusum rejicit quamcumque dispensationem, ut plus quam unum residentiale Beneficium uni, eidemque conferatur: Item in eo quod subjungit, certum sibi esse juxta Ecclesiæ spiritum plus quam uno Beneficio tametsi simplici neminem frui posse,

Pro sua generalitate derogans moderationi Tridentini Sess. 7. c. 5. et Sess. 24. c. 17.

De Sponsalibus, et Matrimonio.

Libell. Memor. circa Sponsalia etc. §. 2.

LVIII. Propositio, quæ statuit Sponsalia proprie dicta actum mere civilem continere, qui ad Matrimonium celebrandum disponit, eademque Civilium legum præscripto omnino subjacere;

Quasi actus disponens ad Sacramentum non subjaceat sub hac ratione juri Ecclesiæ,

(XLVIII)

Falsa , Juris Ecclesiae quoad effectus
etiam e Sponsalibus vi Canonisarum
sanctionum profluentes læsiva , disci-
plinæ ab Ecclesia constitutæ derogans.

De Matrim. §§. 7. 11. 12.

LIX. *Doctrina Synodi asserens , ad Supremam
Civilem Potestatem duntaxat originarie spe-
ctare contractui Matrimonii apponere impe-
dimenta ejus generis , quæ ipsum nullum red-
dunt , dicunturque dirimentia , quod jus ori-
ginarium præterea dicitur cum jure dispen-
sandi essentialiter connexum , subjungens ,
supposito assensu , vel conniventia Princi-
pum potuisse Ecclesiam juste constituere
impedimenta dirimentia ipsum contractum
Matrimonii ;*

Quasi Ecclesia non semper potuerit , ac
possit in Christianorum Matrimoniis jure
proprio impedimenta constituere , quæ Ma-
trimonium non solum impediunt , sed et
nullum reddant quoad vinculum , quibus
Christiani obstricti teneantur etiam in ter-
ris infidelium , in eisdemque dispensare ,

Canonum 3. 4. 9. 12. Sess. 24. Concil.
Trid. eversiva , hæretica .

Cit. Libel. Memor. circa Sponsal. §. 10.

LX. *Item rogatio Synodi ad Potestatem Ci-
vilem , ut e numero impedimentorum tollat
cognitionem spirituales , atque illud quod*

(XLIX)

dicatur publicæ honestatis, quorum origo reperitur in Collectione Justiniani, tum ut restringat impedimentum affinitatis, et cognationis ex quacumque licita, aut illicita conjunctione provenientis ad quartum gradum juxta civilem computationem per lineam lateralem, et obliquam, ita tamen ut spes nulla relinquatur dispensationis obtinendæ;

Quatenus Civili Potestati jus attribuit sive abolendi, sive restringendi impedimenta Ecclesiæ auctoritate constituta, vel comprobata: item qua parte supponit Ecclesiam per Potestatem Civilem spoliari posse jure suo dispensandi super impedimentis ab ipsa constitutis, vel comprobatis,

Libertatis, ac Potestatis Ecclesiæ subversiva, Tridentino contraria, ex hæreticali supra damnato principio profecta.

De Officiis, Exercitationibus, Institutionibus ad religiosum Cultum pertinentibus,

Et primum de adoranda Humanitate Christi.

De Fide §. 3.

LXI. Propositio; quæ asserit, *adorare directæ Humanitatem Christi, magis vero ali-*

(L)

quam ejus partem fore semper honorem Divinum datum Creaturæ ;

Quatenus per hoc verbum *directe* intendat reprobare adorationis cultum , quem Fideles dirigunt ad Humanitatem Christi , perinde ac si talis adoratio , qua Humanitas , ipsaque caro vivifica Christi adoratur non quidem propter se , et tanquam nuda caro , sed prout unita Divinitati , foret honor Divinus impartitus Creaturæ , et non potius una , eademque adoratio , qua Verbum incarnatum cum propria ipsius carne adoratur ,

Ex Concil. C.P.V. Gen. Can.9.

Falsa , captiosa , pio , ac debito cultui Humanitati Christi a Fidelibus præstito , ac præstando detrahens , et injuriosa .

De Orat. §.10.

LXII. Doctrina , quæ devotionem erga Sacratissimum Cor Jesu rejicit inter devotiones , quas notat velut novas , erroneas , aut saltem periculosas ;

Intellecta de hac devotione , qualis est ab Apostolica Sede probata ,

Falsa , temeraria , perniciosa , piarum auriolum offensiva , in Apostolicam Sedem injuriosa .

De Orat. §.10. Et Append. n.32.

LXIII. Item in eo quod Cultores Cordis Jesu

(LI)

hoc etiam nomine arguit, quod non advertant SSīmam Carnem Christi, aut ejus partem aliquam, aut etiam humanitatem totam cum separatione, aut præcisione a Divinitate adorari non posse cultu latræ;

Quasi Fideles Cor Jesu adorareat cum separatione, vel præcisione a Divinitate, dum illud adorant, ut est Cor Jesu, Cor nempe Personæ Verbi, cui inseparabiliter unitum est, ad eum modum, quo exanguie Corpus Christi in triduo mortis sine separatione, aut præcisione a Divinitate adorabile fuit in Sepulchro,

Captiosa, in Fideles Cordis Christi Cultores injuriosa.

De ordine præscripto in piis
exercitationibus obeundis.

De Orat. §. 14. Append. n. 34.

LXIV. Doctrina, quæ velut superstitiosam universe notat *quancumque efficaciam, quæ ponatur in determinato numero precum, et piarum salutationum;*

Tanquam superstitiosa censenda esset efficacia, quæ sumitur non ex numero in se spectato, sed ex præscripto Ecclesiæ certum numerum precum, vel externarum actionum præficientis pro indulgentiis consequendis, pro adimplendis pœnitentiis,

et generatim pro sacro , et religioso cultu rite , et ex ordine peragendo ,

Falsa , temeraria , scandalosa , pernicio-
siosa , pietati Fidelium injuriosa , Ec-
clesiæ auctoritati derogans , erronea .

De Pœnit. §. 10.

LXV. Propositio enuntians , *irregularem stre-
pitum novarum institutionum , quæ dictæ
sunt Exercitia , vel Missiones . . . forte
nunquam , aut saltem perraro eo pertingere ,
ut absolutam conversionem operentur , et ex-
teriores illos commotionis actus , qui appa-
ruere , nil aliud fuisse , quam transeuntia
naturalis concussionis fulgura ,*

Temeraria , male sonans , pernicio-
sa , mori pie , salutariter per Ecclesiam
frequentato , et in verbo Dei funda-
to injuriosa .

De modo jungendæ vocis Populi cum
voce Ecclesiæ in precibus publicis .

De Orat. §. 24.

LXVI. Propositio asserens , *fore contra Apo-
stolicam praxim , et Dei consilia , nisi Po-
pulo faciliores viæ pararentur vocem suam
jungendi cum voce totius Ecclesiæ ;*

Intellecta de usu vulgaris linguæ in li-
turgicas preces inducendæ .

(LIII)

Falsa , temeraria , ordinis pro Mysteriorum celebratione præscripti perturbativa , plurium malorum facile productrix .

De Lectione Sacræ Scripturæ :

Ex nota in fine Decr. de Gratia .

LXVII. Doctrina perhibens a lectione Sacrarum Scripturarum *nonnisi veram impotentiam excusare* , subjungens ultro se prode obscuracionem , quæ ex hujusce præcepti neglectu orta est super primarias veritates religionis ,

Falsa , temeraria , quietis animarum perturbativa , alias in Quesnellio damnata ,

De proscriptis libris in Ecclesia publice legendis .

De Orat. §. 29.

LXVIII. Laudatio , qua summopere Synodus commendat Quesnellii Commentationes in novum Testamentum , aliaque aliorum Quesnellianis erroribus faventium opera , licet proscripta , eademque Parochis proponit , ut ea tanquam solidis religionis principiis referta in suis quisque Paræciis Populo post reliquas functiones perlegant ,

Falsa, scandalosa, temeraria, seditiosa, Ecclesiæ injuriosa, Schisma fovens, et hæresim.

De Sacris Imaginibus.

De Orat. §. 17.

LXIX. Præscriptio, quæ generaliter, et indistincte inter Imagines ab Ecclesia auferendas, velut rudibus erroris occasionem præbentes, notat Imagines Trinitatis incomprehensibilis,

Propter sni generalitatem temeraria, ac pio per Ecclesiam frequentato mori contraria, quasi nullæ extent Imagines Sanctissimæ Trinitatis communiter approbatæ, ac tuto permittendæ.

Ex Brevis Sollicitudini nostræ . Benedicti XIV. an. 1745.

LXX. Item doctrina, et præscriptio generatim reprobans omnem specialem Cultum, quem alicui speciatim Imagini solent Fideles impendere, et ad ipsam potius quam ad aliam confugere,

Temeraria, perniciosa, pio per Ecclesiam frequentato mori, tum et illi Providentiæ ordini injuriosa, quo ita *Deus nec in omnibus memoriis Sanctorum ista*

(LV)

feri voluit , qui dividit propria unicuique prout vult .

Ex S. Aug. Ep. 78. Clero , Senioribus , et universæ Plebi Ecclesiæ Hipponen.

LXXI. Item quæ vetat ne Imagines præsertim B. Virginis ullis titulis distinguantur præterquam denominationibus , quæ sint analogæ Mysteriis , de quibus in Sacra Scriptura expressa fit mentio ;

Quasi nec adscribi possent Imaginibus piæ aliæ denominationes , quas vel in ipsismet publicis precibus Ecclesia probat , et commendat ,

Temeraria , piarum aurium offensiva , venerationi B. præsertim Virgini debitæ injuriosa .

LXXII. Item quæ velut abusum extirpari vult morem , quo velatæ asservantur certæ Imagines ,

Temeraria , frequentato in Ecclesia , et ad Fidelium pietatem fovendam inducto mori contraria .

De Festis .

Libell. Memorial. pro Fest. reform. §. 3.

LXXIII. Propositio enuntians novorum Festorum institutionem ex neglectu in veteribus observandis , et ex falsis notioni-

bus naturæ , et finis earundem Solemnitatum originem duxisse ,

Falsa , temeraria , scandalosa , Ecclesiæ injuriosa , favens hæreticorum in dies Festos per Ecclesiam celebratos conviciis .

Ibid. §. 8.

LXXIV. Deliberatio Synodi de transferendis in diem Dominicum Festis per annum institutis: idque pro jure , quod persuasum sibi esse ait Episcopo competere super disciplinam Ecclesiasticam in ordine ad res mere Spirituales ; ideoque et præceptum Missæ audiendæ abrogandi diebus , in quibus ex pristina Ecclesiæ lege viget etiamnum id præceptum etiam in eo , quod superaddit de transferendis in Adventum Episcopali auctoritate jejuniis per annum ex Ecclesiæ præcepto servandis ;

Quatenus adstruit Episcopo fas esse jure proprio transferre dies ab Ecclesia præscriptos pro Festis , jejuniisve celebrandis : aut indictum Missæ audiendæ præceptum abrogare ,

Propositio falsa , juris Conciliorum Generalium , et Summorum Pontificum læsiva , scandalosa , Schismati favens.

(LVII)

De Juramentis :

Libell. Memorial. pro Juram. reform. §. 5.

LXXV. Doctrina, quæ perhibet beatis temporibus nascentis Ecclesiæ juramenta visa esse a documentis Divini Præceptoris, atque ab aurea Evangelica simplicitate adeo aliena, ut *ipsummet jurare sine extrema, et ineluctabili necessitate reputatus fuisset actus irreligiosus, homine Christiano indignus*: Insuper continuatam Patrum seriem demonstrare juramenta communi sensu pro vetitis habita fuisse: Indeque progreditur ad improbanda juramenta, quæ Curia Ecclesiastica, Jurisprudentiæ feudalibus, ut ait, normam secuta in Investituris, et in Sacris ipsis Episcoporum Ordinationibus adoptavit: Statuitque adeo implorandam a Sæculari Potestate legem pro abolendis juramentis, quæ in Curiis etiam Ecclesiasticis exiguntur pro suscipiendis muniis, et officiis, et generatim pro omni actu Curiali,

Falsa, Ecclesiæ injuriosa, juris Ecclesiastici læsiva, disciplinæ per Canones inductæ, et probatæ subversiva.

De Collationibus Ecclesiasticis .

De Collat. Ecclesiast. §. 1.

LXXVI. Insectatio, qua Synodus Schola-

(LVIII)

sticam exagitat , velut eam , quæ viam aperuit inveniendis novis , et inter se discordantibus Systematibus , quoad veritates majoris pretii , ac demum adduxit ad probabilismum , et laxismum ;

Quatenus in Scholasticam rejicit privatorum vitia , qui abuti ea potuerunt , aut abusi sunt ,

Falsa , temeraria , in Sanctissimos Viros , et Doctores , qui magno Catholicæ Religionis bono Scholasticam excoluere injuriosa , favens infestis in eam hæreticorum conviciis .

Ibid.

LXXVII. Item in eo quod subdit , *mutationem formæ regiminis Ecclesiastici , qua factum est , ut Ministri Ecclesiæ in oblivionem venirent suorum jurium , quæ simul sunt eorum obligationes , eo demum rem adduxisse , ut obliterari faceret primitivas notiones Ministerij Ecclesiastici , et sollicitudinis pastoralis ;*

Quasi per mutationem regiminis congruentem disciplinæ in Ecclesia constitutæ , et probatæ obliterari unquam potuerit , et amitti primitiva notio Ecclesiastici Ministerii , Pastoralisve sollicitudinis ,

Propositio falsa , temeraria , erronea .

§. 4.

LXXVIII. *Præscriptio Synodi de ordine rerum tractandarum in Collationibus , quæ posteaquam præmisit , in quolibet articulo distinguendum id quod pertinet ad fidem , et ad essentiam religionis ab eo quod est proprium disciplinæ , subjungit , in hac ipsa (disciplina) distinguendum quod est necessarium , aut utile ad retinendos in spiritu fideles ab eo quod est inutile ; aut onerosius , quam libertas Filiorum novi Fæderis patiatur , magis vero ab eo , quod est periculosum aut noxium , utpote inducens ad Superstitionem , et Materialismum ;*

Quatenus pro generalitate verborum comprehendat , et præscripto examini subjiciat etiam disciplinam ab Ecclesia constitutam , et probatam , quasi Ecclesia , quæ spiritu Dei regitur , disciplinam constituere posset non solum inutilem , et onerosiorem , quam libertas Christiana patiatur , sed et periculosam , noxiam , inducentem in Superstitionem , et Materialismum ,

*Falsa , temeraria , scandalosa , pernicio-
sa , piarum aurium offensiva , Eccle-
siae , ac spiritui Dei , quo ipsa regi-
tur , injuriosa , ad minus erronea ,*

**Convicia adversus aliquas Sententias
in Scholis Catholicis usque adhuc
agitatas .**

Orat. ad Synod. §. 2.

LXXIX. Assertio , quæ conviciis , et contumeliis insectatur sententias in Scholis Catholicis agitatas , et de quibus Apostolica Sedes nihil adhuc definiendum , aut pronunciandum censuit ,

Falsa , temeraria , in Scholas Catholicas injuriosa , debitæ Apostolicis Constitutionibus obedientiæ derogans.

**De tribus regulis fundamenti loco a
Synodo positis pro reform. Regularium :**

Libell. Memorial. pro reform. Regularium §. 9.

LXXX. Regula 1. quæ statuit universe , et indiscriminatim statum Regularem , aut Monasticum natura sua componi non posse cum Animarum cura , cumque vitæ pastoralis muneribus , nec adeo in partem venire posse Ecclesiasticæ Hierarchiæ , quin ex adverso pugnet cum ipsiusmet vitæ Monasticæ principiis ,

(LXI)

Falsa, pernicioſa, in SSños Ecclesiæ Patres, et Præsules, qui regularis vitæ instituta cum Clericalis Ordinis muneribus consociarunt, injuriosa, pio, vetusto, probato Ecclesiæ mori, Summorumque Pontificum Sanctionibus contraria: *Quasi Monachi quos morum gravitas, et vitæ, ac fidei institutio sancta commendat, non rite, nec modo sine Religionis offensione, sed et cum multa utilitate Ecclesiæ Clericorum Officiis aggregentur.*

Ex S. Siricio Epist. Decret. ad Himerium Tarracon. c. 13.

LXXXI. Item in eo quod subjungit, Sanctos Thomam, et Bonaventuram sic in tuendis adversus Summos homines Mendicantium institutis versatos esse, ut in eorum defensionibus minor æstus, accuratio major desideranda fuisset,

Scandalosa, in SSños Doctores injuriosa, impiis damnatorum Auctorum contumeliis favens.

LXXXII. Regula 2. *Multiplicationem Ordinum, ac diversitatem naturaliter inferre perturbationem, et confusionem:* Item in eo quod præmittit §. 4. *Regularium Fundatores, qui post Monastica instituta prodierunt, Ordines superaddentes Ordinibus, Reformationes Reformationibus nihil aliud ef-*

(LXII)

fecisse , quam primariam mali causam magis magisque dilatare ;

Intellecta de Ordinibus , et Institutis a Sancta Sede probatis , quasi distincta piorum munerum varietas , quibus distincti Ordines addicti sunt , natura sua perturbationem , et confusionem parere debeat ,

Falsa , calumniosa , in Sanctos Fundatores , eorumque fideles Alumnos , tum et in ipsos Summos Pontifices injuriosa .

LXXXIII. Regula 3. qua postquam præmisit , *parvum Corpus degens intra Civilem Societatem , quin fere sit pars ejusdem , parvamque Monarchiam figit in statu semper esse periculosum* , subinde hoc nomine criminatur privata Monasteria , communis Instituti vinculo sub uno præsertim Capite consociata , velut speciales totidem Monarchias Civili Reipublicæ periculosas , et noxias ,

Falsa , temeraria , Regularibus Institutis a Sancta Sede ad Religionis profectum approbatis injuriosa , favens hæreticorum in eadem Instituta insectationibus , et calumniis .

De Systemate , seu Ordinationum
complexione ducta ex allatis Regu-
lis , et octo sequentibus articulis
comprehensa pro reformatione Re-
gularium .

§. 10.

LXXXIV. Art. 1. *De uno duntaxat Ordine
in Ecclesia retinendo , ac de seligenda præ-
ceteris Regula Sancti Benedicti , cum ob sui
præstantiam , tum ob præclara illius Ordi-
nis merita : sic tamen ut in his , quæ for-
te occurrent temporum conditioni minus
congrua , instituta vitæ ratio apud Por-
tum regium lucem præferat ad exploran-
dum quid addere , quid detrachere conveniat .*

2. *Ne compotes fiant Ecclesiasticæ Hie-
rarchiæ , qui se huic Ordini adjunxerint ,
nec ad Sacros Ordines promoveantur , præ-
terquam ad summum unus , vel duo , ini-
tiandi tanquam Curati , vel Capellani Mo-
nasterii , reliquis in simplici Laicorum or-
dine remanentibus .*

3. *Unum tantum in unaquaque Civitate
admittendum Monasterium , idque extra
moenia Civitatis in locis abditioribus , et
remotioribus collocandum .*

4. *Inter occupationes vitæ Monasticæ
pars sua labori manuum inviolate servan-
da , relicto tamen congruo tempore Psal-*

(LXIV)

modiæ impendendo , aut etiam , si cui libuerit , litterarum studio . Psalmodia deberet esse moderata , quia nimia ejus prolixitas parit præcipitantiam , molestiam , evagationem . Quo plus auctæ sunt Psalmodiæ , Orationes , preces , tantumdem peræqua proportionem omni tempore imminutus fervor est , Sanctitasque Regularium .

5. *Nulla foret admittenda distinctio Monachos inter sive Choro , sive Ministeriis addictos ; inæqualitas isthæc gravissimas omni tempore lites excitavit , ac discordias , et a Communitatibus Regularium spiritum caritatis expulit .*

6. *Votum perpetuæ stabilitatis nunquam tolerandum . Non illud norant veteres Monachi , qui tamen Ecclesiæ consolatio , et Christianismi ornamentum extiterunt . Vota Castitatis , paupertatis , et obedientiæ non admittentur instar communis , et stabilis regulæ . Si quis ea vota , aut omnia , aut aliqua facere voluerit , consilium , et veniam ab Episcopo postulabit , qui tamen nunquam permittet , ut perpetua sint , nec anni fines excedent . Tantummodo facultas dabitur ea renovandi sub iisdem conditionibus .*

7. *Omnem Episcopus habebit inspectionem in eorum vitam , studia , progressum in pietate : Ad ipsum pertinebit Monachos admittere , et expellere , semper tamen accepto Contubernali consilio .*

(LXV)

8. *Regulares Ordinum; qui adhuc remanent, licet Sacerdotes in hoc Monasterium admitti etiam possent, modo in silentio, et solitudine propriæ sanctificationi vacare cuperent: quo casu dispensationi locus fieret in generali Regula num. 2. statuta, sic tamen ne vitæ institutionem sequantur ab aliis discrepantem, adeo ut non plusquam una, aut ad summum duæ in diem Missæ celebrentur, satisque ceteris Sacerdotibus esse debeat una cum Communitate concelebrare.*

Item pro Reformatione Monialium.

§. II.

Vota perpetua usque ad Annum 40. aut 45. non admittenda. Moniales solidis exercitationibus, speciatim labori addicendæ: A carnali spiritualitate, qua pleræque distinentur, avocandæ: Expendendum, utrum, quod ad ipsas attinet, satius foret Monasterium in Civitate relinqui,

Systema vigentis, atque jam antiquitus probatæ, ac receptæ disciplinæ subversivum, perniciosum, Constitutionibus Apostolicis, et plurium Conciliorum etiam Generalium, tum speciatim Tridentini Sanctionibus oppositum, et injuriosum, favens hæreticorum in Monastica Vota, et Regularia instituta stabiliiori Consiliorum

Evangelicorum Professioni addicta
conviciis , et calumniis .

De Nationali Concilio convocando .

*Libell. Memorial. pro convoc. Concil. Na-
tional. §. I.*

LXXXV. Propositio enuntians qualemcum-
que cognitionem Ecclesiasticæ Historiæ
sufficere , ut fateri quisque debeat Con-
vocationem Concilii Nationalis unam esse
ex viis canonicis , qua finiuntur in Eccle-
sia respectivarum Nationum controversiæ
spectantes ad Religionem ;

Sic intellecta , ut controversiæ ad fi-
dem , et mores spectantes in Ecclesia qua-
cumque subortæ , per Nationale Conci-
lium irrefragabili iudicio finire valeant :
quasi inerrantia in fidei , et morum quæ-
stionibus Nationali Concilio competeret ,

Schismatica , hæretica .

Mandamus igitur omnibus utriusque
Sexus Christi-fidelibus , ne de dictis propo-
sitionibus . et doctrinis sentire , docere ,
prædicare præsumant , contra quam in hac
nostra Constitutione declaratur , ita ut qui-
cumque illas , vel earum aliquam conjun-
ctim , vel divisim docuerit , defenderit , edi-
derit , aut de eis etiam disputando publice ,
vel privatim tractaverit , nisi forsitan impu-

(LXVII)

gnando , Ecclesiasticis Censuris , aliisque contra similia perpetrantes a jure statutis pœnis , ipso facto , absque alia declaratione subjaceat .

Ceterum per hanc expressam præfatarum propositionum , et doctrinarum reprobationem ; alia in eodem libro contenta nullatenus approbare intendimus , cum præsertim in eo complures depræhensæ fuerint propositiones , & doctrinæ sive illis , quæ supra damnatæ sunt , affines , sive quæ communis ac probatæ cum doctrinæ , & disciplinæ temerarium contemptum , tum maxime infensum in Romanos Pontifices , & Apostolicam Sedem animum præferunt :

Duo vero speciatim notanda censemus , quæ de Augustissimo SSinæ Trinitatis Mystério §.2. Decreti de Fide , si non pravo animo , imprudentius certe Synodo exciderunt ; quæ facile rudes præsertim et incautos in fraudem impellere valeant : Primum , dum posteaquam rite præmisit Deum in suo Esse unum , et simplicissimum permanere , continuo subjungens , ipsum Deum in tribus Personis distinguere ; perperam discedit a communi , et probata in Christianæ doctrinæ institutionibus formula , qua Deus unus quidem in tribus Personis distinctis dicitur , non in tribus Personis distinctus : Cujus formulæ commutatione hoc vi verborum subrepat erroris periculum , ut Essentia Divina distincta in

(LXVIII)

Personis putetur, quam Fides Catholica sic unam in Personis distinctis confitetur; ut eam simul profiteatur in se prorsus indistinctam.

Alterum, quod de ipsismet tribus Divinis Personis tradit, eas secundum earum proprietates personales, et incommunicabiles exactius loquendo exprimi, seu appellari Patrem, Verbum, et Spiritum Sanctum, quasi minus propria, et exacta foret appellatio Filii tot Scripturæ locis consecrata, voce ipsa Patris à Cœlis, et e Nube delapsa, tum formula Baptismi a Christo præscripta, tum et præclara illa confessione, qua Beatus ab ipsomet Christo Petrus est pronuntiatus; ac non potius retinendum esset quod edoctus ab Augustino Angelicus Præceptor (a) vicissim ipse docuit *in nomine Verbi eandem proprietatem importari, quæ in nomine Filii*, dicente nimirum Augustino (b), *eo dicitur Verbum, quo Filius*.

Neque silentio prætereunda insignis ea; fraudis plena Synodi temeritas, quæ pridem improbatam ab Apostolica Sede Conventus Gallicani Declarationem an. 1682. ausa sit non amplissimis modo laudibus exornare, sed quo majorem illi auctoritatem conciliaret, eam in Decretum *de Fide* inscriptum insidiosè includere, articulos in illa conten-

(a) S. Th. 1. P. q. 34. art. 2. ad 3.

(b) Aug. de Trinit. l. 7. c. 2.

(LXIX)

tos palam adoptare , et quæ sparsim per hoc ipsum Decretum tradita sunt , horum articulorum publica , et solemni professione ob-signare . Quo sane non solum gravior longe se Nobis offert de Synodo , quam Prædecessoribus nostris fuerit de comitiis illis expostulandi ratio , sed et ipsimet Gallicanæ Ecclesiæ non levis injuria irrogatur , quam dignam Synodus existimaverit , cujus auctoritas in patrocinium vocaretur errorum , quibus illud est contaminatum Decretum .

Quamobrem quæ acta Conventus Gallicani , mox ut prodierunt Prædecessor Noster Ven. Innocentius XI. per litteras in forma Brevis die 11. Aprilis an. 1682. , post autem expressius Alexander VIII. Constit. *Inter Multiplices* die 4. Augusti an. 1690. pro Apostolici sui muneris ratione improbarunt , resciderunt , nulla , et irrita declararunt , multo fortius exigit a Nobis Pastoralis sollicitudo recentem horum factam in Synodo tot vitiis affectam adoptionem , velut temerariam , scandalosam , ac præsertim post edita Prædecessorum nostrorum Decreta , huic Apostolicæ Sedi summo opere injuriosam reprobare , ac damnare , prout eam præsentī hac nostra Constitutione reprobamus , et damnamus , ac pro reprobata , et damnata haberi volumus .

Ad id genus fraudis pertinet , quod Synodus in hoc ipso Decreto de Fide quamplures articulos complexa , quos Lovanien-

sis facultatis Theologi ad Innocentii XI. judicium detulerunt , tum et alios duodecim a Card. de Noailles Benedicto XIII. oblatos , non dubitaverit ex reprobo Secundo Ultrajectensi Concilio vanum , verusque commentum exsuscitare , temereque his verbis jactare in vulgus , nempe universæ Europæ notissimum esse , eos articulos Romæ severissimo examini subjectos fuisse , et non solum a qualicumque censura immunes exiisse , sed etiam a laudatis Romanis Pontificibus fuisse commendatos : cujus tamen assertæ commendationis non modo nullum extat authenticum documentum , quin potius eidem refragantur Acta examinis , quæ in nostræ Supremæ Inquisitionis tabulis asservantur , e quibus id tantum apparet , nullum super iis prolatum fuisse judicium .

Hisce propterea de causis librum hunc ipsum , cui titulus = *Atti , e Decreti del Concilio Diocesano di Pistoja dell' Anno MDCCCLXXXVI. = In Pistoja per Atto Braccali Stampatore Vescovile . Con approvazione .* , sive præmisso , sive quovis alio titulo inscriptum , ubicumque , et quocumque idiomate , quavis Editione , aut Versione hactenus impressum , aut imprimendum , Auctoritate Apostolica tenore præsentium prohibemus , et damnamus , quemadmodum etiam alios omnes libros in ejus , sive ejus doctrinæ defensionem , tam scripto , quam typis forsam jam editos , seu , quod Deus avertat , eden-

(LXXI)

dos, eorumque lectionem, descriptionem, retentionem, et usum omnibus, et singulis Christifidelibus sub pœna excommunicationis per Contrafacientes ipso facto incurrendæ, prohibemus pariter, et interdiciamus.

Præcipimus insuper Venerabilibus Fratribus Patriarchis, Archiepiscopis, et Episcopis, aliisque locorum Ordinariis, necnon hæreticæ pravitatis Inquisitoribus, ut Contradictores, et rebelles quoscumque per Censuras, et pœnas præfatas, aliaque juris, et facti remedia, invocato etiam ad hoc, si opus fuerit, brachii Sæcularis auxilio, omnino cœrceant, et compellant.

Volumus autem, ut earundem præsentium transumptis, etiam impressis, manu alicujus Notarii publici subscriptis, et sigillo personæ in Dignitate Ecclesiastica constitutæ munitis, eadem fides prorsus adhibeatur, quæ ipsis originalibus litteris adhiberetur, si forent exhibitæ, vel ostensæ.

Nulli ergo hominum liceat hanc paginam nostræ declarationis, damnationis, mandati, prohibitionis, et interdictionis infringere, vel ei ausu temerario contraire. Si quis attamen hoc attentare præsumpserit, indignationem Omnipotentis Dei, ac Beatorum Petri, et Pauli Apostolorum ejus se noverit incursurum.

Dat. die
28. Aug.
1794.

Datum Romæ apud Sanctam Mariam Majorem Anno Incarnationis Dominicæ Millesimo septingentesimo nonagesimo quarto,

(LXXII)
quinto Calendas Septembris , Pontificatus
Nostri anno vigesimo .

PH. CARD. PRODATARIUS . R. CARD. BRASCHIUS
DE HONESTIS .

V I S A

De Guria J. Manassei .

Loco ✠ Plumbi .


F. Lavizzarius .

Registrata in Secretaria Brevium .

*Anno a Nativitate Domini Nostri Jesu Christi
millesimo septingentesimo nonagesimo quar-
to , Indictione duodecima , die vero trigesi-
ma prima Augusti , Pontificatus Sanctissimi
in Christo Patris , et Domini Nostri Domini
PII Divina providentia PAPÆ SEXTI An-
no vigesimo supradictæ Litteræ Apostolicæ
affixæ , et publicatæ fuerunt ad Valvas Ba-
silicæ Lateranen. , et Principis Apostolorum ,
Cancellariæ Apostolicæ , Curiae Generalis in
Monte Citatorio , in Acie Campi Floræ , ac
in aliis locis solitis , et consuetis Urbis per
me Joannem Renzoni Apostolicum Cursorem ,*

Felix Castellacci Magister Cursorum .

LITTERARUM OBEDIENTIÆ
DOGMATICÆ CONSTITUTIONI
AUCTOREM FIDEI
S. M. PII VI.
AB ANTISTITE NN. PRÆSTITÆ
EXEMPLUM
CLERO ET POPULO SUÆ DIOECESIS
Denunciatum simul, et præscriptum,



Acceptam gratissimo Vestro munere , PP. EE. , Dogmaticam Sanctissimi Domini Nostri Constitutionem , cujus est principium *Auctorem Fidei* , qua Pistoriensis Pseudo-Synodi *Acta* , et *Decreta* damnantur , profiteor me non obedienter modo , sed et omni eo mentis , et cordis obsequio amplexum esse , quod Petro debetur loquenti per Pium .

Non mei ingenii , non facultatis est meritis laudibus eam prosequi singularem , ac prope Divinam in eo edendo Decreto Pontificii Consilii sapientiam , quæ (quo majus dici nil potest) vicit expectationem , quam commoverat . Vehementer nimirum , nec immerito damnatio jam dudum expetebatur Synodi ejus , quam vel primo aspectu prudens quisque deterrimam diceret hoc ipso , quod ceterarum , quæ hactenus laudatissimæ habitæ sunt , Synodorum dissimillima prodiret . Nec omen fefellit eventus . Statim enim ut vagari ea libere cœpit , bonis omnibus , qui de summa Religione pie , sapienterque sentirent dolendum fuit , ab infelicis ejus operis Machinatoribus nil minus videri susceptum , quam ut claritati prædicationis Evangelicæ tenebras offunderent , Hierarchici regiminis universi ordinem , ju-

(IV)

ra, libertatem, auctoritatem subverterent; atque importuno restituendæ Antiquitatis assimilato studio, quam nec ipsi sperarent hac temporum conditione restitui posse, vigentis interea disciplinæ statum convelle-
rent, qua dilapsa nil jam ratum, firmum-
que consisteret, atque aperta vaniloquis,
et seductoribus effrenata pateret licentia ad
subvertendum. Nec reapse, si verum fate-
ri volumus, defuere illis Antiquitatis exem-
pla, qui vias inire ex omni memoria tempo-
rum a Novatoribus tentatas, horumque col-
lectas undique artes, et fallacias, etsi jam
pridem ab ætatis cujusque Patribus detectas,
et profligatas subsidio sibi comparare non
dubitaverint.

Atque in primis, ut ad illud me refe-
ram invidiosum caput generalis obscuratio-
nis veritatum in Ecclesia, et earum quidem
veritatum, quæ dictæ sunt a Synodo *basis
fidei, et moralis doctrinæ Jesu Christi*, ne ab
Artemone usque initium ducere necesse sit,
sane cum Pelagianorum Signifer, et Princeps
Julianus objiceret, *toto penitus Occidente non
minus stultum, quam impium Dogma esse su-
sceptum (a)*: Insuper consuetam urgeret quæ-
rimoniam *de invidia*, quam illi *se sustinere
pro veritate jactabant*, et *de paucitate pruden-
tium*, quibus *se placere gaudebant (b)*: Con-

(a) *Aug. l. 4. cont. duas Epist. Pelag. C. 8.*

(b) *Cont. Jul. Pelag. l. 3. c. 1.*

(V)

tra Augustinus ea fretus Catholica sententia tot a se locis adversus Donatistas illustrata, et confirmata, qua plane significat, ac velut fixum, ratumque statuit non magis Christi veritatem, quam Ecclesiam Christi latere posse: *ubi latet Ecclesia Christi, ubi latet veritas Christi* (a); satis esse duxit ad arrogantis hominis frangendam audaciam uno verbo reponere, *hanc veterum, et novorum omnium vocem esse hæreticorum, ipsa consuetudine jam sordidatam, atque protritam*. Ut mirum videri debeat sordidatam istam ab Augustino contemptam, et abjectam generalis obscuracionis calumniam ab illis nunc potissimum hominibus renovari, qui se Augustini doctrinæ, auctoritati, nomini addictos præ ceteris, devotosque gloriantur.

Quo magis optandum erat, ut per damnationem propositionis Synodi, quæ prima est inter proscriptas, claritas vindicaretur ad finem usque Sæculi permansura prædicationis Evangelicæ in Catholica unitate sub visibili Ministerio Pastorum Petri Cathedræ adhærentium: atque ita irrevocabili tandem judicio fixa, et immota consisteret vetusta jam inde ab incunabulis Ecclesiæ profecta auctoritas, quam Apostolici ævi æqualis prope, ac probatissimus Auctor Irenæus hisce verbis testatam prodidit (b). „ Et

(a) *Enar. in Psalm. 87. n. 9.*

(b) *L. 5. cont. hæres. c. 20.*

(VI)

„ Ecclesiæ quidem prædicatio vera ; et fir-
„ ma , apud quam una , et eadem saluta-
„ ris via in universo mundo ostenditur . Hinc
„ enim creditum est lumen Dei , et pro-
„ pter hoc *Sapientia Dei* (a) ; per quam sal-
„ vat omnes homines *in exitu canitur* , *in*
„ *plateis autem fiducialiter agit* ; *in summis*
„ *muris prædicatur* , *in portis autem Civitatis*
„ *constanter loquitur* . Ubique enim Eccle-
„ sia prædicat veritatem , et hæc est *τὴν δ-*
„ *μῦτον* lucernā Christi bajulans lumen „ .

Et quidem cum in visibili Pastorum Mi-
nisterio per Orbem diffuso ; atque una fidei
communione sub uno Supremo Capite de-
vincto conspicua cernatur *Cathedra Unitatis* ,
in qua profitetur Augustinus Deum pos-
uisse *Doctrinam veritatis* (b) , idque ad se-
curitatem plebis , ne umquam salubris do-
ctrinæ veritate desereretur , profecto liquet ,
generaliter obscuratam nec esse ; nec dici
posse partem ullam salubris hujusce Do-
ctrinæ , quæ ad securitatem plebis prædica-
tur sub visibili ministerio , quo *Cathedra*
Unitatis continetur ; aut si quid assertur a
communi ea prædicatione dissentiens , con-
vincatur aberrare a *doctrina veritatis* hoc ipso
quod recedit a *Cathedra Unitatis* .

Non minus proinde ab Augustini men-
te , quam ab omni catholico sensu aliena

(a) *Proverb. 1.*

(b) *Epist. 185. ed. Maur.*

(VII)

ne prodit misera isthæc Adversariorum defensio, dum certas quasdam veritates, quæ antiquitus tanquam totidem fidei capita passim habitæ sint, volunt sic decursu temporum obscuratas esse, ut cum nunc denuo emergunt; novæ appareant: Aut enim veritates istæ in visibilis ministerii continuata successione *ubique, et semper* viguerant, tumque certe novum nusquam accidere, aut videri potuit, quod per visibile ministerium Orbe toto Ecclesia communiter prædicare nunquam destitit: Aut si quid aliquando tanquam novum hujus visibilis ministerii communi prædicationi objici; et apparere contigerit, nequeat hoc ipsum inter veritates illas referri, quas si semel antiquitas tenuit; nunquam deinceps, ne Catholicæ successionis formam amitteret, deserere ullo tempore potuit. Atque hæc una fuit a Tertulliano ad Bossuetium usque plana, certa; planeque invicta perpetuitatis fidei catholicæ in communi prædicatione propugnatio adversus insidiosam istam Novatorum quorumcumque jactantiam; qui probe nossent non aliam sibi ad fallendum paratiorem viam occurrere, quam si, ut primum prodibant, se se; velut prædicatæ olim veritatis, ac postmodum desertæ, penèque oblitæ instauratores, et vindices ostentarent. Quod etiam intelligi potest, quæ sit istorum cum quibus agimus causæ ratio, quibus non aliud sit defensionis, quam quod

(VIII)

semper fuerit errantium omnium commune
perfugium .

Quin et ad hanc eandem , magis magisque
depellendam e mentitæ obscuracionis inyi-
diam , tum et ad fidei , sanæque doctrinæ inte-
gritatem sartam, tectamque tuendam, non pa-
rum est lucis , et adjumenti allatura provida
cautio , quam ex Majorum instituto, et exem-
plo Sapientissimus Pontifex adhibendam cen-
suit, ut quibus locis sub latebris ambigui-
tatis suspiciosa se offerret , ac periculosa
discrepantia sensuum ; perversa significatio
distincte notaretur , cui error subesset ,
quem Catholicus sensus reprobareret . Qua
ineunda ratione Pastor Supremus duo illa
splendide complexus est cum maxime insi-
gnia Apostolatus sui munera , ut et docendi
Magisterio Fidelium mentes luce veritatis
perfunderet , simul et Apostolicæ Auctori-
tatis vigore adversos errores profligaret , id-
que una præstitit quod in causa Pelagii , et
Cælestii Augustinus (a) , Afrique Patres
ab Apostolica Sede (b) magnopere expe-
tebant , ut suspectæ fidei homines suos erro-
res tergiversando fovere assueti , ad certa ,
et enucleata capita revocati prodere se ,
suosque sensus cogerentur , atque ita eorum
*vel astutia , vel correctio diluisceret , nec ulli
ambigua remaneret .* Quod institutum reno-

(a) *Lib. 2. cont. duas Epist. Pelag. c. 3.*

(b) *Epist. 179. n. 61*

(IX)

vari nunc maxime præstabat adversus illas præsertim Synodi perplexas, implicatasque sententias, quæ velut sua sponte prolabantur, aut saltem facilius flecti valent, et solent in eos sensus, quibus ad obterendam Ecclesiæ traditam a Christo potestatem profani homines hac ætate avidius, licentiusque abutuntur.

Qua de re sæpe jam a Sapientibus Viris animadversum est, quam sit affinis, et consentiens eorum ratio, qui regiminis Hierarchici ordinem subvertere moliantur cum insanis illorum consiliis, qui potestatis omnis originem a Populo repetentes, eandem perversionem in Civilis regiminis ordinem invehere aggressi sunt. Par scilicet utrisque Principatus odium, par popularis perversissimæ æqualitatis amentissimum studium. Illi primum discerpta Supremi Pontificatus jura sic inter Episcopos exæquare cœperunt, ut ea mox ab Episcopo in Presbyteros, a Presbyteris in Plebem transferrent, penes quam summa potestatis consisteret, cujus usum Ministris delegaret, quos sibi ipsa selegisset. Isti pari progressu potestatem a Supremis Imperantibus in Magistratus, a Magistratibus in Populum sic transtulere, ut prior illa Hierarchici Ordinis informata perversio, exempli sui contagione posteriorem istam Civilis totius Ordinis perturbatissimam conversionem adduxisse videatur, cujus exitus, quam exitialis fuerit, funestis-

(X)

sima omnium , quæ subsecuta est , nec diu expectata calamitas comprobavit .

Illæ quoque Apostolicæ Censuræ severitatem magnopere sollicitabant , quæ tam multa commota sunt in Synodo adversus pios mores , et ritus in omni pene colendæ religionis officio per Universam Ecclesiam servari consuetos , quæ disciplinæ perversione viderint Synodi Auctores quid reliqui sibi fecerint ad existimationem , quos nec famæ pudor deterruerit ab ea subeunda *insolentissimæ insanix* nota , quam mitissimus , atque lenissimus Augustinus non dubitavit eorum temeritati inurere , qui , quod tota per Orbem frequentat Ecclesia , quin ita faciendum sit , disputare audeant .

Atque in hac ipsa quidem pro arbitratu innovandi licentia eo gravior est culpa Novatorum , quo se illi veterum Canonum studiosiores profitentur , quibus proinde ignorare non liceat , minus vero auctoritatem negligere vetustissimi Canonis inter Apostolicos relati , cujus hæc est præscriptio tot postmodum Conciliorum Sanctionibus , perpetuoque more Ecclesiæ confirmata . „
„ Episcopos uniuscujusque gentis nosse
„ oportere eum , qui in eis est primus , et
„ existimare ut Caput , et nihil facere quod
„ sit arduum , aut magni momenti præter
„ illius sententiam „ (a) .

(a) 33. *Ex interpr. Gent. Herveti .*

(XI)

An vero Canonis hujusce auctoritatem sequuta Synodus est , dum nulla aut Sedis Apostolicæ , aut sui etiam Metropolitæ habita ratione verita non est , Parisiensis Conventus an. 1682 articulos non duntaxat adoptare , verum et in decretis ad fidem pertinentibus eo expresso consilio adjicere , ut publica horum , solemnique adoptione , quæ passim , et sparse per totum illud Decretum perperam tradita sunt , concluderet , ac velut obsignatis tabulis communiret ? Quo sane Synodus ab ipsorummet Parisiensis *Declarationis* Auctorum sententia , et verecundia longe recessit , qui primum ne suspicari quis posset eos quidquam velut ad fidem pertinens in ea Declaratione statuere voluisse , non dubitarunt in *Acta* referre Cameracensis Archiepiscopi responsum , quo testatum erat , non eam Conventus mentem fuisse , *ut ex illa sententia Decretum fidei faceret , sed tantum , ut eam opinionem adoptaret* . Quod et aliis *Actis* , plane confirmat cl. Bossuetius , vel quisquis est Auctor Opusculi , cujus titulus : *Gallia Orthodoxa* art. 6. in *Opere Defensionis* etc. Deinde nec et istud prætereundum erat , Gallicanos illos Præsules ad exponendos suæ Declarationis Articulos non ante devenisse , quam præfati essent se se ab illis longissime abhorrere , qui „ Primatum B. Petri , ejusque Successorum „ Romanorum Pontificum a Christo institutum , iisque debitam ab omnibus obedi-

(XII)

„ tiam , Sedisque Apostolicæ , in qua fides
„ prædicatur , et unitas servatur Ecclesiæ
„ reverendam omnibus gentibus Majesta-
„ tem imminuere non vereantur : „ Con-
tra Synodus nil detestandum hoc imminutæ
Pontificiæ Potestatis crimen verita , non mo-
do expressam illam , quam *Declaratio* præ-
sefert , debitæ ab omnibus Primatus Maje-
stati obedientiæ professionem turpiter omit-
tit , sed quam prorsus præterire non po-
tuit , Primatus mentionem jejune adeo , stric-
timque attigit , ut dum Romanum Pontifi-
cem *primum* duntaxat memorat *inter Pasto-
res Christi Vicarios , Caput Ministeriale , cui
velut Centro Unitatis ceteri juncti sunt cave-
re in primis voluisse videatur , ne paullo
plus quidquam Romano Pontifici concede-
ret , quam quod ei deferre primarii etiam
inter Protestantes Viri ultro se paratos osten-
derint .*

Nec vero quemquam fugit in illis ado-
ptandis articulis callido consilio Synodum
in spem intendisse magni cujusdam ad op-
portunitatem parandi sibi subsidii ; verum
et hic etiam astutam Sæculi prudentiam vi-
cit religionis plena Sapientia Pontificis , qui
nempe cum de una Synodo judicium insti-
tuendum suscepisset , Declaratione ipsa ,
utpote a Synodo aliena , eodem loco , et
statu relicta , quem ex Superiorum Pontifi-
cum Decretis obtinebat , peculiarem , quæ
Synodi propria est , *tot capitibus vitiosam*

(XIII)

adoptionem peculiari damnationi subjiciendam censuit velut temerariam , scandalosam , Apostolicæ Sedi injuriosam , quin et ipsimet Gallicanæ Ecclesiæ , quam dignam Synodus existimaverit , cujus auctoritas in patrocinium vocaretur errorum , quibus illud est totum contaminatum Decretum .

Atque interea dum hæc scriberem , peropportune accidit , ut unius ex præstantissimis Galliarum Episcopis litteræ mihi venerint in manus , quibus Amplissimus Antistes , cum egregium suum in amplectenda Sanctissimi D. N. Pii VI. dogmatica Constitutione plenum pietatis obsequium , suamque communem cum aliis de profligatis Pseudo-Synodi Pistoriensis erroribus gratulationem ad Sacram Congregationem Episcoporum , et Regularium deferret , tum etiam tanquam Gallicanus Episcopus præcipuo nomine de Synodi temeritate gravissime conqueritur , quæ verita non sit insigni plane injuria Gallicanam Ecclesiam afficere , dum hujusce Declarationis an. 1682. adoptionem Decreto *de Fide* insidiosè adjunxit , quo et ei Declarationi majoris auctoritatis pondus adjiceret , et hujus dein , ac totius Ecclesiæ auctoritate ad suos errores tuendos per summam fraudem abuteretur . Jure sane , et merito , quod facile quivis intelliget , qui modo ad pauca illa paullo diligentius attenderit ; quæ sunt ea de re notata , quæque pro rei gravitate haud

(XIV)

piguerit denuo hic , strictimque pertingere .

Ac primum cum in summa expositio-
nis fidei , quam proponit Synodus (idque
præter sententiam Præsulum Gallicanorum ,
qui ut dictum est , nihil se de fide statuere
voluisse testati sunt) profitendos decernit
memoratæ Declarationis articulos , quid aliud
innuit , nisi se peculiarem quandam , et
suam profitendæ fidei normam ex ea De-
claratione voluisse arcessere ; quasi Galli-
cana ipsa Ecclesia fidem aliam Catholicam
agnosceret , quam quæ fides est *æternæ Ca-
thedræ* ? quæ ut præclare Bossuetius præ-
stantissimum ejus Ecclesiæ decus , et orna-
mentum *a Petro , Petrique Successoribus*
edocta nullam novit hæresim (a) : aut sacrum
illud effatum oblita esset , quod a Majoribus
perpetua successione traditum eodem loco
idem Bossuetius luculentis hisce verbis ex-
tulit : *Romanam Fidem semper esse Fidem Ec-
clesiæ* .

Altera injuria , eademque gravissima
extat , proditque se se in conviciis , quibus
omni contumeliarum genere Synodus *Deci-
siones* vexat , quas vocat *indeterminatas* , ait-
que nonnullis ab hinc sæculis prodiisse . Quæ
convicia nemo dubitat , quin potissimum con-
jecta sint in Ven. Constitutionem *Unigenitus* ,
quam nec Pistorienses negare ausuri sunt ,
designatam ab illis fuisse notis iis , quibus

(a) *Serm. de Unit.*

(XV)

Decisiones hujusmodi perstringit , veluti .
„ Decreta profecta ab una particulari Ec-
„ clesia , aut a paucis Pastoribus , minus
„ pura mente promota , ad veterem subver-
„ tendam doctrinam directa , modis irregu-
„ laribus , et violentis intrusa . . . , quibus
„ vulnera Ecclesiæ inflicta sunt recenti
„ adhuc sanguine madentia . „ Nec mirum,
quibus mirifice Quesnellius placeat , tanto
illis odio Constitutionem esse , qua sunt ejus
errores damnati .

At profecto quis ignorat , quanto stu-
dio fuerit ea Constitutio a Gallicanis Præ-
sulibus expetita , non quidem a particulari
Ecclesia , sed ab Apostolica Sede omnium
Ecclesiarum Matre , ac Magistra , quanto
Sapientissimorum Antistitum consensu , ob-
sequio , plausu suscepta ? Ut hæc etiam
præcipua laus fuerit , sic flagranti eorum
studio defensam eam , vindicatamque fuis-
se , ut jam dudum prope sileant in Gallia
ora obtrectantium , nec inter abjectissimas ,
quæ illic supersunt , Quesnellianæ factionis
reliquias quisquam fere extet , qui non se
ultro in Schismaticæ Ultrajectinæ Sectæ ca-
stra conficiat .

Quamobrem si qui sunt , qui minus
æquo animo damnationem tulerint vitiosis-
simæ adoptionis hujusce factæ in Synodo ,
velim paulum se se colligant , secumque ipsi
reputent , ecquid consilii Patribus ipsis
Gallicanis capiendum fuisset , siquidem ad

(XVI)

eos primum causa delata esset Synodi Pistoriensis. Num illi vitia tacere potuissent adoptionis, qua Declarationis, immo Gallicanæ Ecclesiæ auctoritas adscita est ad contumelias obsignandas, non minus rectæ fidei adversas, quam in universam, et Gallicanam præsertim Ecclesiam summopere injuriosas? Tacuissent? An non hoc ipso suo silentio satis annuissent, non immerito a Synodo in Gallicanæ Ecclesiæ auctoritate quæsitum fuisse, repertumque perfuglum? At nefas quidquam tale, tamque indignum de Gallicanis Patribus suspicari. Quæ porro alia depellendæ a se tam iniquæ suspicionis ratio, nisi ejus ipsiusmet infastæ adoptionis aperta reprobatio? Ne videlicet percrebrescere illi sinerent in vulgus, quin et ab ipsismet Pistoriensibus impune jactari, advocatam a se Gallicanæ Ecclesiæ auctoritatem ad obsignandum suum Decretum de fide, eique adyocationi silentio saltem suo Patres Gallicanos paruisse. Quis igitur querimonie locus, Apostolicæ Auctoritatis vigore damnationi provisum esse adoptionis ejus *tot vitiis affectæ*, quam Patres Gallicani pro sua fide, religione, sapientia reprobare ipsi debuissent, si constare sibi vellent?

Nec minus hoc eodem in genere peccatum a Synodo est, quod ad suum arbitrium revocare ausa sit abstrusiorum, quæ in Scholis agitantur quæstionum judicium,

(XVII)

quodque mirandum est magis , dato Congregatis tridui spatio ad cognoscenda Decreta domo allata , de quibus prope per ludibrium sententiam rogati , vocem in iudicium , non mentem , et sensum afferre valerent .

Par temeritas pari animadversione digna se prodit ea parte , qua Synodus de Reformatione Regularium agere instituens , talem ejus peragendæ rationem præscribit , quæ spectat non ad provehenda in melius Regularia Instituta , verum ad infestam illam augendam , quam dudum sustinent Regulares ab heterodoxis præsertim in se conflata invidiam , quorum conviciis turpe semper Synodo fuerit obsequentio rem aures præbere voluisse , quam verissimis laudibus , quibus Orthodoxi Patres , iidemque Clarissimi uberrimos pietatis , ac doctrinæ fructus ex multiplici probata Ordinum Regularium varietate prodeuntes commendare nullo unquam tempore destiterunt .

Indignissimum vero illud est , quod in majorem partem Monialium generatim , et indistincte sædum conjicitur carnalis spiritalitatis convicium (cujus tamen vocis contumeliam æquiore sibi animo Sacræ Virgines perferendam ducent , si modo hanc eandem noverint , eisdemque verbis in devotionem ipsam erga Sacratissimum Cor Jesu ab impugnatoribus ejusdem passim jactari , atque

(XVIII)

a Præsule ipso (a), qui Synodo præsuit ;
expresse jactatam esse). Ac revera quo-
cumque modo *carnalis* isthæc *spiritualitas*
intelligatur , a qua jubet Synodus avocan-
das Moniales , ut *solidis exercitationibus* , ac
præcipue labori addicantur , sive talem intel-
ligi placeat , quæ admixtum quid habeat
impuræ labis , tumque non sine mendacissi-
ma , impudentissimaque calumnia dici po-
tuit , hanc *facere occupationem* (quæ expres-
sa est littera Synodi) *majoris partis Monia-
lium* , quippe nimium abest fœda ista suspi-
cio ab sacris illis ædibus , in quibus *Angelo-
rum vitam* intueri in *terris* sibi videbatur
Ambrosius , *quam quondam in Paradiso ami-
seramus* (b) ; sive , quod planius ex con-
textu toto elicitur , *carnalis ea spiritualitas*
refertur ad exercitationes frequentari soli-
tas in Monasteriis , quas nominatim placuit
Synodo pluribus locis notare velut a soli-
dæ pietatis exercitatione alienas ; tumque
aperte criminatio illa recidit in multiplicia
illa pietatis exercitia , quæ reapse *faciunt* ,
ut ait Synodus , *occupationem majoris partis*
Monialium : exercitia nempe diuturnioris
Psalmodiæ , frequentioris Confessionis ve-
nialium , determinati numeri precum , & sa-
lutationum in sacris statis , votivisve cæ-
remoniis , expiationibus , supplicationibus ,

(a) *Instruct.* 32. in *Append.*

(b) *De Institut. Virginis* c. 17.

(XIX)

aliisve religionis muneribus obeundis; cum specialis cultus erga certas potius, quam alias Imagines, easdemque specialibus, & probatis titulis insignitas, aliasve affines devotiones, quas per summum errorem Synodus rejicit tanquam noxias, periculosas, superstitiosas, erroneas, quæ ipsæ notæ sunt, quibus *carnalis* illa *spiritualitas* designatur, cujus ignominiam devotioni erga Sacrum Cor Jesu Præsul ipse (ut ante dictum est) inurere veritus non est in ea *instructione*. quam Synodus adoptavit. Quamobrem facile perspicuum est, quam pie, quam juste coercenda fuerit temeraria illa Synodi cum iniquissima criminatione conjuncta præscriptio, qua fictæ carnalis spiritualitatis nomine Moniales avocare studet ab religiosis illis exercitationibus, quibus, sive ex suarum quæque Regulârum præscripto, sive ex piis inductis consuetudinibus, sive ex flagrantiori quodam studio perfectionis Evangelicæ, cum laboris etiam dispendio pleræque distinentur. Nec enim ita *præcipua* debet esse cura laboris, cui laudabiliter suum quoque tempus impenditur, quin potior multo ratio habenda sit piarum divini cultus exercitationum, quibus assidue colendis exædificata sunt a sæculari strepitu segregata Claustra Sacra Monialium.

Non omnia ego mihi commemoranda summo, quæ in Apostolica hac Dogmatica Con-

(XX)

stitutione Catholici Orbis gratulatione , et
plausu celebrantur . Sed cum in præclaris
plurium præstantissimorum Præsulum res-
ponsis , quæ videre mihi contigit , animad-
verterim alios alia , prout cuique visum est ,
in ejusdem Apostolici judicii commendatio-
nem adnotasse , in hanc spem inductus sum
non ægre vos , EE. PP. , laturos , si et ipse
pauca longiore quidem sermone , quam epi-
stola , breviori vero quam epistolæ argu-
mentum postulat , capita attingerem , quæ
ut fert varietas ingeniorum , nonnulli etiam
generi hominum existimavi profutura .

Neque id tamen (quod probe notatum
velim) quasi putem humanis qualibuscun-
que rationibus , et argumentis vim pendere
Apostolici judicii , quæ promissionis Chri-
sti divina plane , æternaque auctoritate ni-
titur , suamque firmitatem ab ejus Petræ
soliditate mutuatur , adversus quam portæ
Inferi nunquam sunt prævalituræ . Scilicet
huc spectat hujusce descriptionis ratio , nec
aliud aut mihi , aut aliis in hoc argumen-
to versantibus propositum est , quam ut ru-
dioribus præsertim aditus paretur ad pla-
norem quandam rerum definitarum intelli-
gentiam informandam , qua instructi faci-
lius etiam fraudes eorum , atque insidias
effugere valeant , qui perversa loquuntur ,
ut abducant discipulos post se . Quo in ge-
nere et istuc potissime , omninoque caven-
dum , ne si quid forte scribenti exciderit .

(XXI)

quod minus aptum , minusve firmum videri
queat , hoc ipsum contra jus retorqueatur ,
aut quidquam valere putetur ad vim infir-
mandam definitæ sententiæ , cujus veritas
per se una , planeque inextota , ut dictum
est , Apostolici iudicii auctoritate confirma-
ta , divinitusque sancita innotescat .

Nunc , ut ad illa , quæ ante diximus ;
Antistitum responsa redeamus , quis in tam
brevis intervallo , quo tam multa , tamque
insignia undique allata sunt , quis , inquam ,
non divinum plane mirerur , aut suspiciat
præsentis in Ecclesia providentissimi Numi-
nis immortale beneficium , ut ad vocem Pe-
tri tam prompta , et parata responderit Cla-
rissimorum undique Antistitum in Apostoli-
ca suscipienda Constitutione plena debitæ
venerationis , et obsequii consensio ? Qua
nempe illi *suarum successionum* consangui-
nitatem doctrinæ testati sunt cum Principe
illa , omnium maxima , omnibus cognita , in
Sede Petri a Deo constituta Ecclesia (a) ,
per cujus Pontificum successiones præco-
nium veritatis in omnes gentes ad omnem
futuri temporis memoriam propagaretur : ut
nullus jam vel pertinacissimis obtrectatori-
bus obloquendi locus relinquatur , nisi si qui
spreta successionum per orbem diffusarum ,
et cum principali successione convenientium
auctoritate , vocem ipsam contemnere non

(a) *Iren. cont. hæres. l. 3. c. 3.*

(XXII)

vereatur unitatis Catholicæ , quæ illa successionum cum Prima Sede consensione , et nexu coalescit , continetur , et efflorescit .

His ego salu aris Orthodoxæ doctrinæ præsidiiis miseræ Deo munitus , dictumque memoria repetens B. Cæsarii Arelatensis Episcopi (a) . . , Sicut a Persona B. Petri Apostoli Episcopatus sumit initium , ita necesse esse , ut disciplinis competentibus ab Apostolica Sede singulæ Ecclesiæ quid observare debeant , erudiantur . . Spondeo quoad vires ferent , daturum me operam , ut ab his , qui pastoralis meæ curæ subiecti sunt , præfatæ Dogmaticæ Sanctissimi Domini Nostri Constitutioni debita obedientia tribuatur . Interea , dum vobis , PP. EE. , salutaria omnia , et prospera ab omnium bonorum Largitore precari non desino , vota-que mea cum Vestris conjungere , ut Misericors Deus Ecclesiæ Suæ Sanctissimum Dominum Nostrum quam diutissime servet , ac præstet incolumem , EE. VV. manus humilime deosculor .

Romæ die 24. Decembris 1794.

(a) *Libel. ad Symmachum ap. Labb.*

